

翁山詩外

06


CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

4 OCT 1951

T5460/72443

共十二本

六



翁山詩外

卷之八

五言律 五

舉第四子阿豫

番禺

屈大均

撰



秀出有豪矜頻聞呱矣時生稊慚老樹得子似孫

枝命以丁年好男因豫卦知同予霜降月弧矢四

方期 丁卯九月十七舉第四子先期占得豫卦因

月故第五句云云

行年過始杖亦已作者英犬子生偏晚鷓雛養漸

成阿婆歡欲抱而父咳初名薑酒來親串呱呱羨

此聲

花祿人爭送歡生滿月時月娥金粟種天帝玉蘭
枝上有三兄小中多一母私羽毛成立日吾已杖
朝期

銀作麒麟小胸前掛莫多契名從大士求福向須
陀飯雜香蕉餵衣兼繡祿拖女兄爭襁負不遣日
摩娑

家貧無食母自養益劬勞剪髮初成角勝冠待拂
髦飲愁雙乳少啼愛數聲高閭史書名罷光宗望
汝曹

孩笑娛尊母含飴弄未閒八旬無白髮九十尚紅
顏尺寸龍孫嫩參差雉子斑旨甘慈旦夕爭食一

堂間

尚欠商瞿一明年五子齊祗愁無紙筆不恨少楂
梨井曰梁家婦耕桑翟氏妻老萊嬉戲日猶自作
孩提

題蒲澗簾泉宴坐圖爲朱君

嗟爾掇瑤草菖蒲花正催言尋赤玉鳥遂上鶴舒
臺煙霧迷秦帝巖泉接道開謂單道開少君吾得否欲

入畫圖來

誰識堯時韭長生一紫茸三花飛瀑濺九節暮煙
重一日辭東海三朝戲祖龍神仙君已得冰雪看
秋容

聞道漳河日君爲佐郡賢賦裁銅雀下杯引玉魚
邊未老身難隱成童道已傳千金方不少內外葛
洪篇

羽化英雄事吾生未寂寥無花非藥餌有酒卽
喬汝逐安期去能將蒯徹招朱明深洞口未隔水
簾遙

賦贈賈新會

往日丁侯積從師學有餘丁積爲新會令嘗老人

惟碧玉白沙嘗自稱碧玉老人弟子復嘉魚謂李孝廉承箕君此爲

仙令人多賦樂居兕觥爭上者春酒美何如

爲陳母謝夫人壽

光祿曾孫婦徽音出謝家光輝將九鳳潔白得三
花夫子同緇帙諸生亦絳紗堂前春獻酒不少是
侯芭

送徐序仔還嘉興徐乃吾友盛南樵外甥

當年知我者數子在嘉禾復有而甥舅相將倚嘯
歌自歸窮海上無復故人過汝愛沉香浦來遊奈
別何

郝公猶易勝汝舅是韓康車洪相尋日沿澗不可
忘無年隨杖屨有道在農桑君亦能高蹈風流水

一方南樵賣藥車洪奄逝今十餘年矣

徐熙今是汝名冠寫生家數有屏風點還多沒骨

花時時團扇上飛出雛妃斜贈我兼山水氤氳見
海霞

蕭條徒作客未有主人賢遊說非金橐丹青是石
田秋歸隨海燕晚食當河鮮我亦圖忠養艱難賣
力年

送李緩山還楚

世事猶如昨交情直至今三年徒奮發一代遂浮
沉湖接新堤濶江連沔口深松窓歸臥好枕外有
瑤琴

客遊雖寂寞得盡故人歡吾道同黃菊相期保歲
寒楚人哀怨善荆國水雲寬漁父知君者長吟向

釣竿

老來還此別南北洞庭分大耋須相見悲歌必使
聞歲教鴻雁至復寄蕙蘭芬衛武能齊聖無嫌飲
酒勤

爲番禺孔使君母陳太夫人壽

孔門司馬配有子政聲傳自覩神君美彌知壽母
賢承恩鳧嶧地就養祝融天鮑女多珠黍爲餐定
得仙

縣令多爲相如今亦漢時神明元母教孝友更人
師介福康侯受徽音太姒貽番禺榮養日官舍擘
離支

龐祖如以張喬美人畫蘭見贈詩以荅之序有
友人龐子祖如有張喬美人畫蘭一幅上有陳
文忠公桐君所題詩詩曰谷風吹我襟起坐彈
鳴琴難將公子意寫入美人心公嘗於南園五
先生抗風軒集名流十有二人開社喬每侍公
弄筆墨賦詩有送黎孝廉美周詩云春雨潮頭
百尺高錦帆那惜掛江臯輕輕燕子能相逐怕
見西飛是伯勞又有送李山人煙客詩云子夜
徵歌特底忙奈何花月是離觴春江千折牽遊
舸若箇津頭柳線長又云香作飛塵玉作煙輕
寒微月養愁天梅花本是江南弄一壘關山倍

可憐皆清婉多風得詩人比興之旨喬既工于
詩復美顏色歌舞妙絕一時故爲諸名士大夫
所愛每有讌集喬必與年二十有一病垂危彭
孟陽文學以數百金贖之附於千金市駿骨之
義喬竟不起孟陽葬之於白雲山麓梅花坳送
者數十百人下至緇黃人詩一章植花一本以
表之號曰花冢祖如嘗至其處以爲可與花田
相頡頏云文忠忠臣喬麗姝其書與畫世不多
有祖如藏此四十餘年矣丁卯秋偶爲予言及
其事遂割愛相贈蘭凡兩叢生石上葉長者五
短者八九花已開未開者有七葉細花柔宛有

露笑煙啼之致蘭根旁有小印一文曰逢永逢
永者黃孝廉聖年南園社中十二人之一也逢
永嘗有贈蘭妓詩試問蘭妃下蘭晚青蘭何似
紫蘭佳蓋謂喬也又有九曜山房對梅贈歌者
張喬詩而王說作過喬墓亦爲詩云今人薄意
氣紅粉死多時惆悵花林暮荒涼白露滋其慨
歎之若此頃見湯建孟言其少時嘗見諸詩人
挽張喬詩及喬傳墓誌孟陽集爲一編載某人
栽某花卉而刻喬遺像其上字畫精麗殊可玩
壬戌秋至戴氏家出美周先生手書觀之則所
錄喬詩三絕乃喬送已及烟客之作讀之恍然

想見其爲人嗟夫文忠忠臣美周亦忠臣也喬
一女子而三詩一畫乃藉二公以傳喬一何幸
而得此建孟亦有喬所畫蘭一幅予謂建孟盍
題詩其上並以贈予予將從戴氏乞取美周所
書三詩並陳中洲給諫之跋裝演爲一大軸出
入提携以爲吾忘憂蠲忿之一物焉中洲者文
忠之弟亦南園社人之一吾他日復修南園詩
社又將以此爲風雅嘉話矣屬祖如索詩爲報
因賦六章以荅其意喬字二喬廣州人
自來忠潔者香艸最情深况出佳人手芬馨直至
今數莖纔作態一朵已生心尺幅風流在相貽愧

所欽

珠江如錦水亦有薛家濤白紵徵吳曲紅箋出楚
騷長因蘭蕙艸益見鳳皇毛相國多憐惜題詩綵
筆勞

碧血成黃土紅顏化紫煙心香花上發手澤扇頭
妍秘賞勞之子珍藏積有年紫莖將綠葉長託畫
圖傳

相國真書少銀鉤爲紫鴛美令紈扇貴忠使墨花
香栢栢歌難歇蘭蓀恨正長義公魂魄在應倚杜
秋娘

美人魂葉葉終古託忠貞白璧譏元亮梅花笑廣
平離騷能好色太上豈忘情出入吾懷袖應高畫

苑名

誰知蘭麝土花冢卽花田有影隨胡蝶無聲與子
鵲畫空留兩幅詩已失諸篇割愛持相贈知君是
好賢

丁卯臘月十三日恭逢家慈大人八十有四
壽日喜賦五章

歲歲嘉平月詩稱壽母篇麻姑將九十桃子定三
千養恨芝薇薄居愁市井偏多金辭仲子未是許
身年

八十還餘四生年值甲辰詎知王氏臘猶是漢皇

人膝下頭皆白堂前綵自新多孫爭杖屨扶過杏
花鄰

忠養無窮日難終孝子身三千王母歲六十老萊
春竹笋冬方茁梅葩臘已新爐紅燒雉熟持作早
餐頻

內則時時讀中言子法多味調魚子醬香入燕兒
窠未恨清貧甚徒嗟少壯過萊衣無所有日夕一
漁簑

有子黔婁似生涯老更貧多慚難絕俗所幸未違
親作苦成無養爲高致不仁游盤今不敢且保白
華身

戊辰元日作

憶昔 先皇帝元年此戊辰久無王正月徒有漢
遺臣草野私哀痛漁樵愧隱淪千秋殉宗社血淚
更何人

雞鳴肅冠服北面拜 威皇弓劍長如在陵園不
敢忘元年猶此日正朔更何方有限遺臣庶哀思
淚幾行

昔日煤山事重華野死同諸臣多藁葬二女亦攢
宮國破非明主人亾豈校童元年誰復憶拜手五
雲中

鼎湖龍去久四十又三年神聖偏亾國憂勤未格

天書王多史法報主有詩篇元祀從今始春秋在
一肩

一元過六十復自戊辰開王氣今年轉天心昨夜
迴暖風初拂柳春色早驚梅好爲流鶯盡深深栢
葉杯

元日晴明甚寒消昧爽時花添開歲事鶯速立春
期一室衣冠獨中華故老誰崇禎多野史散佚有
餘悲

初三日
立春

稚子唐巾小雙雙作漢裝未能懷故國亦解問
先皇玉几瞻天際雲旗想帝鄉戊辰年再遇光復
意何長

明年吾六十得作伏波無益壯先神智全歸後髮
膚風雲須慘淡天地久荒蕪此日先皇淚威靈

鑒一夫

斑斑吾鬢髮已老是姿年欲飲無吳酒長吟只楚
篇南風吹水淡朔雪化雲鮮採十難爲養今春早
種田

天桃三四藥色向歲朝新白首偏憐汝紅粧莫笑
人琴邊那有恨酒外更無春兒女爭花勝先簪折
角巾

送歛人羅子浮山還溧溪兼寄令母舅汪子

栗亭

栗亭家潛溪在黃山
之麓去溧溪十里

深溪知不遠十里卽潛溪一水連甥舅參差烟樹
西宅因黃嶽好才與外家齊此日白雲際郝公何
處棲

羅浮爲姓字汝亦一羅浮白嶽不歸去孤雲安所
求能詩如舅氏過我此炎洲未有瑤華報離居黯
欲愁

爲我持書札殷勤致渭陽明春木蘭檝同至越王
鄉白首此相待狂歌殊未央平生我知己情是栗
亭長

送蘇友燕

平生志沮溺未有耦畊人之子思南畝將歸及暮
春湖田淮口接水屋白鷗鄰名父難爲子期將素
業新

新年

新年偏雨積最喜鳥催晴不是歲寒客安知春望
情酒須紅粉送花要白頭迎鶯小能歌曲參差莫
斷聲

幾日陰寒甚年光在雨中花教愁思盡鶯使夢魂
空臘果爭兒女春醪讓老翁收燈今歲早人事覺
匆匆

細雨無朝夕衝寒客不過花愁今歲少酒恨去年
多老未辭耕作閒惟事嘯歌河清終已矣難俟奈

君何

送徐司業

徐庾才華盛相逢慰所思六朝名父子一代好人
師路指京華日情牽海嶠時自憐同越鳥持贈只
南枝

相知君未晚夢寐十年餘白首來求友青山得著
書竹蕉揚裔布魚蠲越人蔬肯待離支熟干旌過
敝廬

袞袞登臺省而今少布衣鄭公樗散是司業酒錢
非老大書頻寄文章命漸微海雲分袂處心與數
鴻飛

京國如相問君言在海東梅花猶漢臘菰米亦吳
風別緒縈春柳離聲託暮鴻異時重握手應傍景
陽宮

送成大夫

復作沉香浦人欽子大夫明朝共蘭楫祇有石家
珠越鳥多能語蠻花盡作圖木棉携得否絕勝女
珊瑚

奉寄定安胡朝翰先生

名輝祖

一歲雙元祀心悲乙酉年開科當主辱求士得君
賢禁錮元吾志沉冥答所天偷生過七十慚愧說
神仙

乙酉為弘光元年
隆武元年

吾家有花萼與爾孝廉同出處皆勤事存亾一匪
躬墓門餘宿草魂氣逐悲風 襄帝遺臣盡嗟君

草莽中

先兄諱士燦與先生同舉乙酉科
先兄在雲南行在官禮部郎中

白髮蕭疎甚康成但幅巾時窮誰處逸道在自忘
貧奇甸三神島遺民 二祖身造門多屣履戶內
聞無人

半畝檳榔樹雙叢薏苡花有身歸草木無夢與煙
霞醺酒霑紅葉彈棋拂落華新詩知幾許海外想
名家

送王將軍

多年南越地未覺有將軍士馬時相見笳簫間

聞鏡歌多自作銅柱不言勲此日還京邑承家荷
大君

鼓吹黃門盛相迎闕下廻定須大司馬詩冠柏梁
臺坐次諸王貴功高一代才人思文武甚吉甫復
能來

送送珠江水交人念伏波恩威皆涕淚去住一謳
歌霸氣銷南武遺宮掃趙佗戎車無所有未載斨
珠多

去歲花朝後華堂燕喜時賓僚三益會孝友一人
期別管吹吳曲離絃寫楚辭自今高詠史月夜復
誰知

一春

一春暄暖甚微雨忽生寒悔與錦衾別徒令羅袂
單花教貧未已酒使病無端歸去同冰蘂蘭房種
合歡

無端豔陽候作客向江臯西上愁春水東飛恨伯
勞庭幃增喜懼兒女損清高垂橐且歸去閨中憶
大刀

客裏多春思無心對玉觴鶯知何處好花只故園
香角枕無端別瑤琴不忍張無人買辭賦取酒與
卿嘗

相親方一月卽與鏡臺違無力花畱在多情鳥喚
歸桃根方倚檝蘇蕙正鳴機少別成流滯何因得
奮飛

過黃積菴南軒賦贈

一室城南小幽人已有餘花乘三月食葉待一秋
書詩句先年老禪心入夜虛我來分嘯傲每至暮
鐘初
君志在山水時時琴響流紅顏方似日白髮不會
秋花笑客不飲鶯知人欲愁煙光正和暖且復半
塘遊

香山過鄭文學艸堂賦贈

與君同學早四十四年前白首歡初盡青春恨未

捐汝師餘碧血吾道在黃泉不盡招魂意同裁大

小篇師謂陳巖野先生

於予多一歲同是杖鄉時飲酒教難老茹芝得未
衰武公應九十萊子且嬰兒莫惜頻相見殷勤作
社期

相畱過數日言笑盡精微好學寧知老行年每覺
非海雲光動戶山氣冷侵衣欣賞多圖畫流連欲
未歸

咫尺沙岡市魚鰕不少錢蟹黃隨月滿沙白入春
鮮百貨通洋舶諸夷接海天渺茫蠓鏡澳同去恨
無船

香山多海味我意欲移家况復潮田賤浮生易作
沙傭畊須二頃求食更孤槎地主君長在吾生自
有涯

香山過茄頭村作

雨多春水淡乘興過漁家鱗鱗方圓甲魚烹黃白
花田人多種草稅戶每爭沙十字門西望茫茫天
一涯

舶口東洋接潮來百里聞帆檣爭落日島嶼亂浮
雲拾鬣雌雄竝開蠓左右分家家多海錯邀我醉
氤氳

春日過訪王用禴園亭作

鐵爐城內巷君作一丘園水竹頻無路煙花似在
村蝶同居士夢鶯與美人言幽賞忘歸去依依爲
綠尊

行行漸入林春自一家深二畝花猶少三年柳已
陰番山微見影瀑水似聞音自此長來往聽君弄
玉琴

種葱

欲供春膾用當臘種葱多地凍堅冰始泥乾小雪
過食兼沙韭好齋奈露葵何寸寸慈親意盤中雜
蒔蘿

香荔

新州香荔好得種白楓亭細小如龍眼芬芳似素
馨熟看嫌太赤生食恨多青兒女簪雲髻輕輕出
畫屏

任秋浦解清河令歸養詩以贈之

爾亦崔秋浦三年拂袖頻采蘭爲處子種柳卽先
民稼穡自茲務柴桑誰與鄰歸來辭更好先示女
蘿人

解官歸未得賣畫向清河父老畱蘭蕙兒童乞芟
荷白華身未老黃菊節初過咫尺圭峰曲相期共

嘯歌

任雅善
畫蘭

壽鄭母何太夫人兼呈令子太史

高堂珠黍就令子玉珂還兄弟鴛鴦似于飛煙水
間花爲王母勝玉作歲星顏壽母詩相和人稱大
小山

百歲孫嵩母吾今亦似君人言牲鼎好不及玉堂
芬無欲同朱萼多才且白雲鄭家餘巨棗食我肯
相分

送高固齋

海內文章伯而今復有君端溪來采硯自割水巖
雲天地與神物圖書垂大勲精華時沐浴日月使
氤氳

紛紛五經客復見大春來詞賦還香草春秋又玉
杯輕帆千里掛故國八閩回著作時相寄知言在
越臺

過黃氏南軒作

離離瓜架外花種鳳仙多愛老還朱槿牽情更綠
蘿香須焚水熟味可養天和白首無餘事生涯一
嘯歌

布水村

姬人陸氏墨西所
生地在高要境

生長雙鬢地柑蕉十里園綠蘿梁氏井香水漢妃
村峽影斜當戶江聲直到門天教兵火後碧玉一
家存

布水村名好吾憐此有人能生桃葉女來助墨花

春繫艇依江岫持觴坐艸茵郎家人競看笑語滿

東鄰彼中稱女
塔曰郎家

盡映蕉林出來窺宋玉姿苧蘿無女久烏鵲得夫
遲戶熟秋蠶候家收早稻時年年視公姥帆落此
江潛

攜公新棲仙掌峰詩以贈之峰在七
星巖西

大士何年至禪房此淨居長畱仙掌在定是散花
餘具體同西率駢枝出太虛參差霞色映君愛削
葱疎

七星巖壑外一朵水芙蓉亦有仙人掌何如玉女
峰磬聲驚亂葉棋響落長松雲臥吾將汝年年紫

翠重

一路從天井螺旋出白雲飛花牀上亂瀑水掌中
分入定安蟬響閒行及鹿羣莫教人看奕仙日易

斜曛携公
善奕

石琢楸枰好泠泠煖玉敲聲兼松子落影與竹陰
交步處花隨杖齋時鳥下巢橘中吾欲隱可許共
煙梢

荅汪晉賢

玄墓迴舟日脚蹶未訪君長令碧巢月流照一浮
雲夢寐日已積鶯花春屢分新詩今見寄香似澤
蘭聞

羨爾浮谿館賡詠興不孤鴛鴦兄婿弟花萼玉聯
珠好客因風雅移家爲畫圖故人簞谷子周青最
得共菰蘆

賢兄作仙吏惠政在高涼豈意玉棺墮頻令珠鳥
亾三吳匍匐至五嶺瘴煙長辛苦春令鳥銜哀殊
未央

咫尺扶胥口期君鼓柁來蜚花漁父菜螺鈿海人
杯老更逢三益愁應解七哀故人懷樵李同把玉
琴開

壽張觀察

公來南越重忠孝將門高奕葉山河固連枝節鉞
勞逢迎過錦里剪拂及珠毛公讌多風雅縱橫奮
彩毫

玉門飛將種大烈早丕承嶺表新心膂河西舊股
肱友于連袞繡臣節凜淵冰天上張公子名揚白
少陵

英靈從二舉生甫菊花辰文武憑師表功勳作懿
親日生南海夜秋似朔方春憲府高開處恩威徧
越人

下車方數月未暇事登臨瓴甌陶公力楸枰謝傅
心衡文高玉尺化俗善雕琴祖述風騷得洋洋正
始音

生理嚴公在飄零念鬢華客情依節制詩說愛紛
葩勿復勞裴冕全應作浣花元戎驅小隊時過野
人家

殷勤嚴僕射情向灤西分乳酒憐漁父山瓶送馬
軍風流還此日倡和更如雲獻壽無他物黃華絕
世芬

酒濁

絕與渾河似絺中漉不清白衣難再得黃菊只空
榮歲儉無香秫人愁有寶箏搗彈當月夕亦復一
忘情

五十九歲生日作

紫髯雖滿鏡終奈二毛何白日從他暮朱顏且自
醜楚丘神智少萊子笑啼多明歲杖鄉得居然六
十皤

壽黃叅軍

樂聖杯休放秋花正滿檐未曾慚柳下似不愧陶
潛五十能知命升沉更不占素心人咫尺相照復
冰蟾

壽某方伯

杭州人

方岳開南極臺門俯藥洲捲將明聖水來作海珠
流禾黍多陰雨壺觴及素秋壽星相照曜長接紫
薇樓

野花

花愛無名好，維舟折數枝。
東家嫌太赤，北地恨多脂。
峽外人爭看，溪中女不知。
玉顏殊寂寞，似在葍蘿時。

汲靈山寺泉作

泉從雲際落，半作玉簾飛。
峽口穿花汲，餅中帶雪歸。
滿城烹石乳，一筧到松扉。
歲歲吾來此，臨流一浣衣。

自抱丈人甕，凌朝汲素華。
清泠含宿雨，挹注亂明霞。
活愛爐中火，香宜廟後茶。
載歸涓滴好，分餉復雲芽。

七夕作

暮歸從錦水，瓜果客前陳。
正及穿鍼節，新添乞巧人。
玉簪香出髻，雲液煖當唇。
共惜天孫苦，年年隔

漢津

玉簪花也

年年牛女夕，歸向畫堂深。
烏鵲憂無力，蜘蛛喜有心。
殷勤碧玉女，縹緲紫簫音。
不寐看銀漢，泠泠花露陰。

終歲匏瓜似，今宵織女逢。
金錢還帝少，河漢隔天重。
夜豈人間淺，情應天上濃。
自今忍離別，仙去駕茅龍。

雲漢應清淺，雙星渡未遙。
家家罷機杼，一一望河

橋聖水月中汲天香花外燒七襄知巧絕肯與我
仁嬌粵人以是夕
爭汲聖水

葵扇

玉手蒲葵扇輕搖風滿襟團圓班女樣裁剪越娘
心未覺冰純好長憂白羽侵憑君懷袖裏出入到
秋淡

用自王丞相炎方不汝輕葵田多下種蕉扇少知

名就葉成明月因風御太清合歡無不可篋笥忍

忘情

岡州種蒲葵之所號曰葵田
今嶺外人多誤以蒲葵扇為芭蕉扇

芋

頻隨粳稻熟早芋紫莖長亦是炎方米能為野客

糧肥因春雨足味得土膏香一乳纍纍子吾園種

最良

桃溪

夾岼蒙茸竹枝枝有鳥啼夢飛芳艸外愁在夕陽

西水驛連三峽人家各一溪女郎祠畔望煙雨一

秋迷

經高要諸村墟作

高要村落好一種芭蕉半作蛋娘布全勝鮫室

綃陰多安夏日響亂似春潮子熟無人買兒童作

餌饒

西截泮江水人家半捕魚柑花山女戴蕉葉野人

書潦白禾難長霜黃木未疎月知船有客相照水
窓虛

一路魚花步江人取不稀潮來炎海遠瘴到鬱洲
微澁勒成山砦離支作水圍鷓鴣啼斷處春有一
人歸

浮沉鳧雁似婦女打魚船白莢惟求米黃花不取
錢嘗乾明月下衣溼沓潮邊越女芙蓉種何人不

可蓮

白莢黃
花魚名

九江魚種戶三水蛋家村艇出多高尾嘗開半硬
門川從交阯遠山到大堯尊一片柑橙國人煙紫

翠屯

高尾蛋人艇名硬
門者掛嘗之所

虛日從金利蕉身買到村女紅多作布男事半爲

園野鹿當春滿潮雞未曙喧場師吾欲學橘柚映

衡門

市日謂之虛
日金利村名

木芙蓉

單瓣雖云薄無霜亦自紅香生黃蘂外秋在玉顏
中美種沅湘少嘉名菡萏同芭蕉淡傍汝涼愛綠
衣風

老至

老至貧逾甚無營但晝眠瓶餘陶氏粟杖少阮家
錢妻子同饑渴琴書欲棄捐黃花不肯放畱待酒
如泉

髮少惟冠籜龍鍾節一枝紅顏應有日白首豈無
時菊暖秋難得柑寒晚更安終同黃綺輩嬾作帝
王師
白頭依膝下人羨六旬人谷口何如鄭商顏不是
秦收嫌香稻晚采愛紫芝春日夕弄雛鳥嬰兒戲
錦茵

白菊

冬淡方吐蘂不欲向高秋搖落當青歲芬芳及白
頭雪將佳色映冰使落英畱寒絕無人見梅花共
一丘

贈王生

世受能騎射時來志定邊三千兵法客十八冠軍
年北是驍驍地南非鷓鴣天看君絕塵去及父紫
金鞭

題關中程氏臨流圖

獨坐向流水不知花滿身橫琴復何事垂釣只斯
人石作峰峰筍雲爲片片茵蒼蒼葭茨外此境是
西秦

霧重

霧重知風起明應三日寒地侵霜氣溼天入雪雲
乾服餌貧來少衣裳老去單梅花今手植可得廿
年看

語云一朝霧三朝風

乘霧取鳧鴈，宜寒是水鄉。
蠙膏霜後滿，螺柱雪前長。
打網勞漁婦，盤鹽急海商。
菊花嫌早放，辛苦及春陽。

贈陳山人

四聖精微得知君，術絕倫嚴遵非日者。
管輅是人學，易吾多過加年汝。
益神相逢先問壽，可及杖朝辰。

聞人談曹州之勝

聞道濰沮會州名，舊是曹花頭。
多尚白菊本，更宜高客有雙河。
老連沛字雙河交多五嶺豪，山東耆舊少餘爾。
在蓬蒿花謂牡丹彼中以白者為貴，菊以高丈許者為貴。

奉陪富平程相音歷穗石洞訶林出西郊作

昔予婚弄玉，今每愛秦人。
况是頻陽客，彌淡瓜葛親。
相逢當穗石，竝坐得花茵。
西出昌華苑，晴看十月春。

諸田和大李，昔作主人賢。
吾子方垂卯，當時未比肩。
三秦來夢寐，萬里此周旋。
辱贈詩歌古，蒹葭白露篇。

地多南漢迹，佳處是花田。
訶子園林外，朱明門戶邊。
閒尋蘭若坐，倦拂石苔眠。
試望朝臺月，蒼蒼已出煙。

愛話關中舊，相知首富平。
文章真性命，隱逸老聲

名味苦思蘆酒音悲憶寶箏憑君語供奉來慰別
離情

答贈程虞三

九峰三泖畔書畫一家家女亦雲林似風流未有
涯人爭團扇草更愛灑西花白露方凝戾蒹葭隔
暮霞

程有蒹葭
古亭詩卷

作客來吾越詩歌迥不同開元南海體正始曲江
風唱和勤觀察聲華助主公月明開幕飲不遣酒
尊空

魏塘風雅盛吳浙恣憑陵我友周簞谷言君一季
鷹燕梢

船名

浮碧水鱸膾出寒冰中有楚漁父援毫

畫未曾

汝共干旌至光生海上鄉世家忘獻子苗裔愛高
陽水截扶胥口山開栗里莊無能具雞黍荷蓀未
情忘

時同張觀察
枉駕沙亭

喜徐謂六同何東濱程虞三程相音周南美
枉顧沙亭之作

上客山陰至穿松步履勞茅家蔬食薄陶令葛巾
高海月隨苓箬山泉赴桔槔新詩頻見贈光采滿
蓬蒿

坐共青苔石棋聲落一花含冰徐孺鏡散綺謝公
霞劍拂龍精冷屏開雀尾斜玉臺新詠序一任阿

陵誇

豈意雲門客來看石戶農不知煙管嶺子家煙可

似臥龍峰君家紹興城中有臥龍山采摘惟秋菊流連及暮鐘

為予作圖畫記取海山重

喜周南美同諸子枉顧沙亭

吉甫多諸友君來燕喜同花愁銀燭照酒畏玉壺
空孝友先張仲神仙後葛洪叨陪殊未已卜夜更

秋終

浙東山水地最憶鑑湖橋汝宅當梅市人來必畫
橈相逢問耆舊尚在幾漁樵杯酒淋漓絕悲歌答

此宵

白駒嘉客返良馬大夫來爾作同車客人知入幕

才拜親孤嫠出見子二雛催著作吾何敢憑君玉

尺裁時張觀察同至

不仕

不仕元慈令春秋意在茲猶能成老大豈敢恨流

離柳翳蟬多葉松棲鶴有枝婆娑長膝下絕勝據

鞍時

夜宿沙洲有作

沙洲今夕宿月似一人孤不寐同秋雁相依更夜

烏初寒山兔少未曙水螢無耿耿懷明發漁歌起

綠蒲

晚菊

豈爲尊無綠黃花不肯開
暖隨重九過寒待立冬
來葉頰愁霜染葩香愛雪
催稀疎難飽食看殺在
莓苔

漸轉南天氣冬來寒不知
非關幽菊晚自足肅霜
遲瘦弱全生葉芬芳半在
枝苦心成數本培植學
場師

未開香已出朶朶入秋心
蘂恨含霜少花愁飲雨
淡分來田父種采向石堂
陰笑共龍鍾節朝朝作
意簪

勸影嗟無酒黃花笑一秋
風難乾客淚雪易白人
頭病恐高堂覺貧憐小婦
愁平生謀食拙老更作
黔婁

杯杓生塵久無錢送酒家
長齋憎苦葉不食待明
霞白蚤三秋艸黃遲九日
華貧中無一可嘯詠是
生涯

喜值關中李玉之有作

曾爲秦地客不作越人吟
我祖元西屈南遷自舉
陰逢君好賓客置酒向園
林板屋多君子能知風
雅音

求仙復何所最愛是西秦
一日爲簫史千秋憶鳳
人城隨珠斗曲橋出絳河
津何日橫門入君家更

望春

我本王孫舊關中漢始遷三閭興大楚五族冠諸
田反本思河舉爲都待澗灑從君歌慷慨更在小
戎篇

野菊

苦苴生宐野無心籬落間祇因甘味少得使冷香
閒蘭已當門盡裕猶待客還蕭疎簪數朶未覺鬢
毛斑

何妨同野艸歲晚爲誰貞蒂已平生苦花猶一日
榮東籬無此種靖節未知名珍重過霜雪微芳莫
自輕

答吳東巖

與君賢父子兩世唱酬輕一自廣陵別重聞鳴鶴
聲羽毛三歲滿霜露九臯清仙唳成詩句相貽最
有情

汝夢羅浮月梅花村見無洞多毛女在峰未老人
孤哲父雙龍子名家一鳳雛霜林能念我子母白
頭烏

賦得養親惟小園爲吳綺園題所居梅莊

梅莊清絕處兩代養親園雞黍多人客鶯花亦子
孫賢兄鳳池去令弟鹿門存出處皆慈孝家人無
間言

爲吳楞香綺園母唐太夫人壽

以子弟兄賢人多壽母篇猶勤蠶績事正學舅姑
年玉杖扶朱萼金綸降紫天爭求女論語肅拜寢
門前

受福從王母兒孫孝養新無煩青鳥使自足白華
人國語應多紀家風素可親七旬殊未艾萱艸有
餘春

古爵篇

古爵高二尺許商周宗廟器汪子鼎
先君所寶既失復得故爲賦之

古爵商周物先公手澤鮮重歸慈孝感永寶子孫
賢入土銷銅質成花疊錦錢瓶壘無恨淚人廢蓼
莪篇

畱別館主人凌君

父子能畱客殷勤端水涯相如無縣令季布有朱
家酒釀惠泉水魚烹楊柳沙多慚賢地主車騎未

光華

楊柳沙多
產嘉魚

連朝陰雨甚行李苦淹畱閭里逢輕俠都亭慰倦
遊情淡羊峽水夢暖雁城秋明歲西湖曲還當假
小樓

冬至同兒明洪在西江舟中有作

朝暎初出浦水霧未分天暖欲含春氣光微散白
煙陽和生玉盞雲物引香箋節向舟中拜兒曹祝
大年

艘船

八字競乘風斜張扇子篷飛揚紛水客出沒一梢
公海自三門入洋教百貨通橫江諸大艘最是粵
船雄

左右雙帆起垂天似大雲勢爭飛鳥疾聲與沓潮
分伐鼓辭沙廟拋香爲水君待流時下碇隱映在
斜曛

冬日作

白兔裘輕暖偏空嶺外人無冬難作冷未臘已偷
春菊蕊餐初罷梅枝折又頻白頭浣花客愁見歲
華新

含愁

含愁似煙樹最是夕陽時故苑今安在啼鶯汝可
知花無秦女影木有越人枝多少傷春淚年年寄
與誰

送方六

桐城多我友藥地是吾師子弟皆能學如君更好
辭依人來嶺海問道得軒羲歸取潛夫論研心未
老時

潛夫方先生有周易時
論一書藥地其冢子也

贈王仲子新昏

愛爾辟疆園相過有綠尊能文詞伯子好武衛家
孫旭日初鳴雁天桃正爛門翩翩秦士會佳詠述

新昏

小除後二夕與姬人香者兒明洪飲寓樓上
有賦

越俗團年席吳風守歲盤頻乘金盞暖莫弄玉琴
寒稚妾爲香史嬌兒作酒官半酣歌一曲婉孌有
餘歡

寄吳綺園

謝家春草綠池上日油油爾亦惠連好長同康樂
遊鷓鸞兄太液芝木弟丹丘貽我黃山志相期三
海頭

新詩兼見寄才歎歎人多黃嶽與靈秀浮丘同嘯
歌三珠兄弟樹百尺鳳凰窠日向湯泉浴雲衣掛
綠蘿

廣利墟

單日人爲市舟船集水鄉店開金利仔祠賽木棉
娘魚賤無人買柑多任客嘗酒墟無大小一一噴

花香

墟期單日廣
利雙日永安

蕓

南方蕓十品一一越人糧買似蹲鴟賤餐同地腎
香露葵須爾伴山藥未集良美種來黎峒無煩辟
穀方

汪扶晨得予所寄詩外賦詩志喜予感其知

已之淡亦賦二章答之

昔聞浣花老最愛李青蓮今子才無敵依然讓謫
僊筆驚風雨落杯訝瀑泉懸狂客四明在還教與
酒錢

年年惠書札吾子最情淡不有千金劍安知一片
心關山難獨往魂夢易相尋數把離憂寫泠泠一
玉琴

奉和張觀察長至前一日端州曠怡樓晚眺
西江吞左右萬里作洪流砥柱無三峽朝宗有一
樓梅先長至發菊後小春收觀察乘暄暖休輕叔
子裘左右謂左

煎粉席上口占同用煎字

細作香杭粉光分雪色妍攤成春餅薄疊出白環
圓石蜜香心卷蘭膏素手煎玉盤寒具外此餌及

賓先白環餅名○寒具謂之餠

越俗甘粦少擎來粉食先瓊靡香稻屑金銚素油

煎婦女添茶素兒童減餅錢爭言飴飴美未若粬

妝鮮釋名云煮麥曰粦急就章甘粦殊美楚辭屑瓊靡以為粬靡音糜吳筠說餅云煎以金銚

廣俗謂油糲薄脆之屬曰茶素孫嵩問趙岐餅買幾錢賣幾錢揚雄方言曰餅謂之飴楚辭粬粬蜜

餌粬粬以蜜和米麵熬煎為之

吳筠徒說餅未見粉香煎細杵春雲子重羅糝雪
絲南中希食麵野外此登筵不用椒蘭灑糖霜已

可憐

南油茶子美粉餌恣淡煎浸米寒泉冽成膏白玉
絲茶蘼為角好椰子作養先束皙如餐汝應添賦
餅篇束皙有餅賦

茶蘼花

南海茶蘼露千瓶出此花醜顏因白日醜面即紅
霞色著霑衣客香歸釀酒家摘防纖手損朶朶刺

交加

澳門番女以茶蘼露霑酒唐人衣上以為敬

玫瑰同名族南人取曬糖全添紅餅色半入綠尊
香露使花頭重霞爭酒暈光女兒兼粉果相餽及
春陽

哭王用禴

城中吾友少相見即交淡况復園亭好兼之騷雅
音暮霞時引領朝露忽傷心汝愛狂歌客泉臺何
處尋

共有孫嵩母歡娛百歲期蘭羞猶夕上土室已朝
辭孝子身方始微官罷未遲孤心餘寸艸化作白
華枝

蟬蛻人間早蘇耽遂不歸淚應畱橘井魂尚著萊
衣藥恨君臣失瓜憐子母稀幾時方化鶴來向北

堂飛

君善醫藥

身隨婚嫁畢五嶽向黃泉有命安朝權無心託杜

鷓鴣人亡嵇氏散鬼唱鮑家篇寒食他時哭琴彈宿
艸邊

送鮑子韶

舟繫海珠石雙帆喜未開可如潮與汝端卽去還
來世老千金劔天畱一代才如新期白首且爲盡
離杯

月黃

月黃含雨氣隱映畫樓前笛向寒光起聲隨素影
傳海風青作凍漁火白成煙宿鳥驚梧葉愁人又
不眠

青凍
風名

酌酒

夕陽簾半捲樓倚碧桐陰月上縫衣手花開酌酒
心螢光沾雨溼鳥影逐煙深語罷潮雞起星河半
欲沈
素馨開向夕上髻益生香露已侵羅袂風猶戀石
牀酒邊書史足琴外嘯歌長手弱杯須小輕搖琥
珀光

弱子

淵明憐弱子戲側有餘歡欲授嬉春曲先分守歲
盤安男多種艸待女更滋蘭未有田園業遺安恐
未安

揚帆

揚帆入白雲十里水痕分
新舊潮相杳陰晴日未
曛芙蓉猶野服麋鹿已人羣
行役雖非願人生亦
貴勤

挂席

青東吹挂席舟拔一峰高
煙雨生魂夢風波失羽
毛但能長襪襪不敢恨蓬蒿
游俠胡爲者徒令愧
寶刀

立秋後五日作

已是立秋來涼風尚未催
臥乾蕉葉簟吟冷藕花
杯宿鳥煙初合流螢雨不
開窺簾有明月欲曙尚
徘徊

爭秋殊未已酷熱似城中
水氣暮方冷林聲朝尚
空汗沾紈扇雪香駐縠衣
風菱藕充饑渴佳人玉
齒融

舟宿黃槎涌作

兩岬陰晴異山容互有無
牛羊數村暝燈火一人
孤夜織多蕉布秋收少荔
奴女郎祠畔宿魂夢恨
棲鳥

夕陽

夕陽山更好青接半天陰
峽影煙開闔江聲石淺
深涼蟬爭咽樹落葉乍驚
林欲宿人村遠依依逐
暮禽

不眠

不眠因近峽貪聽鷓鴣聲一夕朱樓別三朝白髮
生花村溪入市石棧細通城細小峰無數含愁翠
不明

上西江作

又溯泔江上秋來跋涉勞風吹青凍大浪作白頭
高解渴須涼粉蠲愁更濁醪落帆就溪女索取鱸
魚刀

江行

江行才十里戍鼓兩邊傳犬吠紅毛估人驚白底
船花添沽酒物米是買魚錢蛋女休相笑貧遊不
似前

白艚洋海至香舫澳門來雨勢過龍媪霞光起蚌
胎潮爭新舊水酒醅淺淡杯多謝波臣好殷勤送
客迴

芭蕉

芭蕉三十里葉葉有人家綠散一天雨紅開二丈
霞織成蠻女布漚作越人麻抽盡心千卷無心卽
是花

家家種蕉樹無暑到村來葉作三秋雨花驚一夜
雷全梳黃子熟半卷綠心開一種龍牙好香宜入
舊醅

蕉亦稱奇布成筒生熟兼絲挑針子細絺似葛兒
織赤久花難變黃深子太甜生涯惟種此最是野
人廉

答鄒清士贈研

一片分蕉葉真巖此不多親從東洞割自取細沙
磨玉氣雲常溼花痕蠟未過持歸與嬌女小字寫
曹娥

爲程母陳太夫人壽

春雨多萱艸秋霜復女貞黃金兒范蠡白髮母陶
嬰端水嘉魚美梧州寄酒清八旬猶戴勝旁有董
雙成

七夕歸自端州有作

年年當七夕千里亦還家愛看穿鍼婦歡陳乞巧
花雲含橋影細星射水光斜兒女逢佳節容粧分
外華

歸乘瓜果會七夕未參商天上雙牛女人間一鳳
凰月明環珮影風暗蕙蘭香莫使星河曙長教夜
未央

清淺天河水風波更勿疑黃姑迎及早織女渡休
遲烏鵲輸靈羽蜘蛛散巧絲汝南雞怕汝無賴五
更時

人間多死別天上只生離辛苦雙星隔殷勤一夕

期淚添銀漢水衣習桂華枝絕勝嫦娥寡淒涼入
月時

張槎江上晚望

車嘗逆流上只是取黃魚日落晚虹外潮生秋雨
餘樓多知大姓田好爲長渠榕樹千株裏攀枝亦
不疎

天南四首爲香丹侍者作

天南花與菜總作合歡枝相贈三秋色相憐百歲
期書催嬌女學琴得美人師十賚因生日年年汝
不遲

番禺有合歡
花合歡菜

天南紅豆子勿復作相思蛺蝶紛無數鴛鴦白不

知三千方朔早十六阿侯遲欲老吾慚汝情深白

首時

天南多媚藥蝙蝠不須持白髮仙無日黃泉殉有
期芙蓉肥已子楊柳老猶絲詎忍留丹訣雲山作
別離

天南多蚌蛤光曬九秋時龍女珠應足鮫人泣莫
悲珊瑚紅尚淺翡翠碧方滋乳待張蒼飲殷勤大
耄期

素馨

無錢花亦買暮暮上頭來香得雙鬟吐光含片月
開珠璫爭大串茉莉讓重臺細草穿燈好枝枝照

酒杯

向夕分兒女人人雪一圍繞宜雲髻大穿要綵絲
微花敗來能蚤花田去不稀年年當酷暑家以素
馨肥

人氣添芬烈開偏與夜宜如霜留到曙未月戴多
時掛帳成瓔珞張燈廢料絲中秋涼爽夕香作雪
風吹

如雲留一半香不散天明溼處能消暑乾時亦助
情摘分蠻女手穿徧越王城競向千門賣金錢擲
不輕

龍眼

炎方龍眼實端不讓離支益智秋初熟蠲愁晚更
宜家家爲焙日處處結圓時絕似韓嫣出金丸逐
不遲

七月孤圓熟村村作果箱味能爭黑葉色更染黃
薑逐利先三楚乘秋出五羊年年珠子樹末富勝
蠶桑

爲圃

老圃吾能及平生學在茲菜同尼父祭蔬似鮑焦
持多雨菊英爛微陽蘭葉滋養梧高出竹未是賤
場師

煖酒秋多葉薰茶夏有蘭影嫌衣竹溼聲愛屐苔

乾種草圖蠲忿栽花要合歡歲寒無可悅生菜滿
春盤

丈人餘一甕抱向白雲間夜雨初成水春泉不在
山藥苗肥可食桐乳嫩堪攀乞得葵花種開畦日
不閒

月高

月高猶未暝半帶夕陽黃墜葉乾多響流花溼亦
香劍留無好匣琴去有餘牀已矣人終窶憂心且
復忘

秋日集汪氏寓齋同用支字

涼隨數點雨蕉葉未全知暑退無多客秋來莫少
期月爭宮餅大花讓玉杯遲可惜當炎夏無緣賭
荔支

空山

空山愁獨往無計避殘春游鹿非吾土啼鵲是故
人花過三月市艸失六朝茵山鬼多離思芳馨只
自珍

送朱君之貴州

黔中兵火後君去貴陽春幕府無雙士將軍有一
人飛揚三楚地鼓舞百蠻民寄我苗刀好芙蓉砂
更新

贈王山史

行草推王氏鶯羣更絕倫君今傳筆髓不但作經
神老大猶唐物風流已晉人名家多父子端可冠
西秦

賦得失學從兒嬾

家學會何有從兒嬾讀書義今存不仕計只好爲
漁我已三冬少誰還萬卷餘白頭徒著述身後孰
傳予

賦得長貧任婦愁

交謫尋常事憂心且自寬貧知終窶好富識可求
難仲子妻猶飽黔婁婦未寒浮雲諸不義誰得野
人看

送羅君

新安多我友尺素每傳書兩度勞吾子親携雙鯉
魚翩翩千里遠一一十年疎青玉和金錯殷勤拜
覬餘

鴈來君又去去去拂欵山過莫惜羽毛便而辭牋素
多故人盡饑渴秋望在巖阿早慰長相憶開書一
嘯歌

沙口

江從沙口小樹漸老榕多風向夕微冷水含秋始
波黃花隨處得白鳥有時過一鰲浮沉去無人知
棹歌

九月初十夕

風起知霜降蕭齋氣尚寒未消三日病已得一秋
安藥餌將書換花枝擁被看燒泥生熟半斟酌欲
分蘭

黃落

黃落未云滿秋聲夜始多稍含疎雨去微帶早霜
過粉飄三徑籜衣亂一池荷蟋蟀頻相怨當如歲
暮何
貪涼因竹下乍病起新秋未得黃花食頻含絳葉
愁琴教紅版掛酒命綠尊留自擘增城柚香生角
枕頭

西園

芙蓉菱葉外菱筍蕩根邊乳結三冬米泥耕十里
蓮白通江水活肥出土膏鮮老圃多居此橫塘不
種田

三城爲圃地十里養塘家秋竈香蓮葉春盤辣芥
花榕連龍眼暗柳倚木棉斜一路多蘭若疎鐘散
海霞

摘蓮當五月蓮外薤田浮菜向西園販花從白廟
收紅菱雙角早赤糯一邊秋生計場師好於陵與
我謀

地近西禪寺芙蓉映酒帘藕多成白粉葉每裹黃

黏菱角憐長嫩離支恨太甜野人持素饌留客坐
茅檐

一春

二春毛食久十畝未青黃作苦雖無力居貧尚有
方水鹹禾易爛田瘠麥難長不少夫家怨辭農去
故鄉

十口

十口愁艱食夫田不納租大禾霜降少晚稻小寒
無白蜺頻肥鴨青蟲未飽烏滑甘調幼婦好媚九
旬姑

初轉

初轉丹飛雪塗顏膩粉同昔惟貽弄玉今復贈香
東越黛憐微綠胡脂厭太紅祗須時飲酒花色似
桃叢

病中卽事

月上維摩女天花居士姬病中能侍藥閒處卽調
絲綠剪青荷葉紅簪白槿枝無錢買釵鈿吾窶縞
衣宜

妻解挈舟至兒知取藥回長勤心力盡稍靜性真
開衣少拋花匣書多礙鏡臺青蓮還有妹未見月

圓來

太白女弟
字月圓

不寐

不寐當城堞魂穿鼓角過未雞愁月滿將雁畏霜
多髮已病逾白顏須衰更醜黃花吾與汝好奈歲
寒何

月出暮煙生樓臺影半明溼花啼露久乾葉嘯風
輕山鳥夜多思草蟲秋有情姬人教莫寢一爲奏
琴聲

姬人工早臥往往懶鳴箏素手何曾冷紅粧不肯
明月嫌穿牖白風畏入簾清病態黃花似凌寒一
朶輕

江上早行

南風多海霧秋氣未全蘇城郭江吞吐樓臺煙有
無黃浮初日大青出遠峰孤漁火猶明滅波喧已
浴鳧

霧重知多蜺漁人競祭沙南風秋更起北雨暮多
斜野鴨肥千畝河豚飽萬家蠊筐新蛻好斟酌送
黃華

送季子之惠陽

知爾豐湖去深承太守情若非徐孺子安得謝宣
城詩入寒山好人添秋水清早歸當歲暮家食待
經營

菊

重陽殊未發誰識歲寒情少苦因黃蕊多甘是素

英帶霜拖麪白和露點茶清種爾宜饑渴芬芳養
此生

蕊至秋猶小重陽不得看白嫌霜降煖黃待立冬
寒冷落辭蓬戶馨香上簪冠數枝那忍食香沁已
心寬

籬間雞犬到枝葉不成窠種處秋陽少分時暮雨
多香真吾臭味影只自婆娑老大宜簪汝其如短
髮何

春秋佳日少艸木本心多人老同黃菊天寒在綠
蘿味經青女苦顏待白衣醃蕊熟雖能發終如歲
晏何

賦得失學從愚子

記誦今年少生書問不知無師陶氏子失學少陵
兒樂有非賢父遺安及幼時劉殷那得似各授一
經遲

非狂

非狂人不信盡作酒徒着市上無屠者淮陰有釣
竿英雄宜髮白老大更心丹慘淡風雲會時來定
不難

海味

海味沙螺美河豚好在秋白憐蠔粉嫩黃愛蟹膏
流魚買多論斗禾儲少滿篝今年西潦苦沙坦半

無收

拾禾

拾禾田婦滿爭稻野鳧多早恨鹹潮浸遲憂白露
過蓼花陰古渡菰葉亂寒河便欲携漁具乘秋涉
海波

結網

蠲肥新白露螺瘦未秋分蜆子飛乘霧魚花起似
雲久於漁事熟未了海翁勤結網無如爾垂竿不
在君

澳門

廣州諸船口最是澳門雄外國頻挑釁西洋久伏
戎兵愁蠻器巧食望鬼方空肘腋教無事前山一
將功

南北雙環內諸番盡住樓薔薇蠻婦手茉莉漢人
頭香火歸天主錢刀在女流築城形勢固全粵有
餘憂

路自香山下蓮莖一道長水高將出舶風順欲開
洋魚眼雙輪日鱗身十里墻蠻王孤島裏交易首
諸香

禮拜三巴寺番官是法王花繡紅鬼子寶鬘白蠻
娘鸚鵡含春思鯨鯢吐夜光銀錢么鳳買十字備
圓方

山頭銅鏡大海畔鐵墻高一日番商據千年漢將
勞人惟真白蠶國是大紅毛來往風帆便如山踔
海濤

五月飄洋候辭沙肉米沉窺船千里鏡定路一盤
鹹鬼哭三沙慘魚飛十里陰夜來鹹火滿朶朶上
衣襟

秋海棠

何年人淚化朶朶向秋開葉已無情去花猶有恨
來多啼愁露溼欲笑喜風催影與閨人似依依然在
綠苔

己巳臘盡作

懶服蕪菁子從教蒜髮新壽須歸老母閒莫讓仙
人病去桃花喜貧來燕子嗔歲寒無雨雪爭得見
陽春
煙深知有雨春色一何遲歲暮無窮事梅花白不
知愁過高臥日貧到白頭時臘酒鄰家熟無錢愧
玉卮

立春作

暖逐立春來梅花一夜催氣猶晴雪在聲已早鶯
開競擲金錢去爭持寶勝回水仙吳下至更買供
香臺

士女春牛會歡娛滿越臺家家人勝節一一小年

杯生菜青絲出陳醪白玉開食盤鄰曲餽香雜絲
花來

春餅兼黃白團年粉果香肴憐雙女月髮恨一人
霜花事從今始年光正未央莫教河畔艸又逐客
愁長

處處喧街鼓催年是此聲花燈初有市雞跣未當
城已喜三冬暖尤宜一日晴春盤多菜品老圃甚

娛情

諺曰最喜立
春晴一日

已得周花甲應能駐大年朱顏猶四十白髮未三
千曲逆長貧後扶風益壯前春來方一日已覺客
愁捐

冉冉流光去心孤老大前王家非我臘天祐是臣
年夢失雙蝴蝶愁歸一杜鵑春來須努力飲酒逐
花眠

舊國寧無臘貧家亦有春書殘王正月泣盡漢遺
人地老千年恨天私一日貧梅花憐苦節相伴過
蕭晨

窮愁誰得似蕭瑟自年年王霸知無日英雄料不
天花寒猶帶雪艸暖已含煙鶯燕休多語教人晝
不眠

荅酒家王君惠酒

梅花三白好包酒自姑蘇以我能名飲因君不用

酤白衣陶令有紀叟謫仙無醉向山丹道吾顏勝爾朱

五羊佳醞少風俗重燒春非此惠泉釀安知秋露

醇自來天美祿多與酒仙人君愛婆娑醉尊疊見

貺頻漢書酒者天之美祿

玉饋清如鏡無乾復一樽忘憂憑此物難老不須

言花氣春初暖鶯聲日已喧酒泉君挹注自此更

源源神異經西北荒中有玉饋之酒酒泉注焉酒美如肉清如鏡其上有玉樽取一樽復一樽

出與天地同休無乾時飲此酒人不死長生

耽酒因寒苦陽春醉裏回素華衰鬢失紅藥軟顏

開甕下容吾臥壚邊謝客來文珪賒酤慣不遣債

家催吳志云潘璋字文珪性博蕩嗜酒居貧好家至門輒言後豪貴當相還

子雲有奇字好事每來過寂寞勞相問醇醪恨不

多反騷情更苦尚白意如何腹大鴟夷似朱顏未

得醜

辟惡新年酒芬香到敝廬山顏猶未得瓶瀉已無

餘席點林花亂杯含海月虛思同嵇阮輩酣暢就

壚居

喜某使君枉駕

檐前乾鵲噪知有客人來鞍馬驚窮巷壺觴戀小

臺艸含煙色暗花映雪光開不是狂山簡那能醅

酤回

泉至

泉也

童子擔泉至含冰盡冽寒味難過
蠚眼香易發龍團多飲能如醉
沉憂也白寬雨前春芥好誰更寄
林端

冉冉

冉冉飛光疾持憂益自催已殘華髮去復貶玉顏
來祇有將離艸曾無却老杯落花知寂寞應爲一
徘徊
年華看冉冉春與未春同怨艸何須綠愁花不用
紅姬人嫌服散翠羽望開籠桃李須臾事依依爲
好風

送客返新安

微茫合蘭海西接虎門津蜃作樓船氣鮫爲織作
人潮隨風力大天逐水光新一舸將漁父君歸理
釣綸

汪栗亭復以紫霞茶見寄

爲憐甘冽水巢父不捐瓢况有紫霞茗來從黃嶽
遙故人勞手製嘉客把書招共啜長松下三年饑
渴消

盤蓮

一片玉盤水何殊玉井天移來菡萏種行作鴛鴦
蓮尺寸耕泥淺東西置藕偏最憐三兩葉珠已瀉

光妍

羅翁八十有五善琴詩以贈之

橫琴復何事老向七絃中髮是先朝白顏非故國
紅蠟愁花有力養壽酒無功爲我彈神化泠泠松
下風

老知琴德好新斲嶧陽桐太古追元響先王詠素
風無憂誰皓髮有道自方瞳汝亦成連子移情山
水中

盆荷

種荷愁水滿水滿出荷遲移向玉缸裏兼之紅藕
枝葉防公子摘花待美人持莫使微莖折纏綿未

有絲

白藕西園至花多種不同茄長方尺寸葉少未西
東美盎光含綠肥泥色帶紅芙蓉開自好莫讓曲
池中

夫子手植檜

生生仁聖意一檜每開屯氣得乾元大靈含萬古
春葉知興廢早花應帝王真百尺杏壇畔摩挲鱗
甲新

素王遺一樹歲久不生枝神聖有餘澤榮枯無盡
時地鍾靈氣獨天與太和私想像刪修日陰隨几
杖移

子貢手植楷

仲尼元氣在復此萬年枝一室心喪日三年手植
時枝條相嚮哭風雨至今悲再拜婆娑下何曾梁
木萎

栽培自端木高出宮墻陰諸子亦奇樹千株同聖
林治任歸獨後廬豕痛偏深手澤有如此扶疎知
幾尋

繞塋多異樹世世莫能名一楷存梁柱孤標出魯
城冕檀連翠色五味接芳英終古思堂側依依復

女貞皇覽孔子冢塋中樹以百數皆異種魯人世
世無能名其樹者民傳言孔子弟子異國人

各持其方樹來種之多梓粉雜離女貞五味
龜檀之樹夫子歌泰山壞乎梁柱摧乎

聽八十有五羅翁琴

十五抱琴眠彈琴七十年梅花無數曲弟子幾人
傳揮手向遺老知音懷古賢新聲紛滿耳唱嘆欲
潛然

望海

水浮元氣上風起卽成潮地勢歸洲島天光散次
寥黃魚三月上白鷺一人招無數攀枝樹紅霞漲
不消

虎門東浩淼水與白雲平海蜃春多氣天雞夜有
聲燒鹽農力暇種草子田成十畝菱塘曲吾躬欲
往畊

愁

愁心無可寄花落斷腸邊人逐雙流水春歸一片
煙寒依香炭坐暖擁素書眠琴匣蛛絲滿彈時記
去年

夜坐

形影同深夜燈邊一侍人香煎沉水片酒酌雪花
春不寐聽疎雨無言倚翠茵茫茫兒女事嘆息爲
清貧

老矣

兒女半強葆啼饑不斷聲貧令慈孝損愁覺死生
輕舊葉當春落新花向臘榮時乎那可再老矣淚

空傾

搖落

搖落見喬木黃含葉葉煙無多秋色外一半夕陽
邊雞犬村村稻牛羊處處田丈人知有客歸及月
明前
一夕江楓樹清霜葉葉流紅令秋有色黃使客多
愁鴻雁又將至菰蔣何處求無歸當歲暮不忍寫
離憂

小荷葉

尺尺出金塘風吹壓紫鴛瀉愁珠子重裁恐翠帟
長未得花含豔先教葉吐香君憐相偶意莫折向

菰蔣

客至

朝來知有客喜母著人衣果踏山花至能驚宿鳥
飛無綿三月冷絕粒一春肥只此門前水洋洋已
樂饑

田家雞黍禮絕似丈人貧四體勤終歲三農備一
身藜蕪肥細犢荇藻媚修鱗不厭茅茨陋還來酌
暮春

聞笛

三孔羗人笛多因驚馬吹聲從秋戍起淚向夕陽
垂黑水連沙暗黃榆似草衰征鴻過渭北書報翠

樓誰

望洋臺

浮天非水力一氣日含空船口三巴外潮門十字
中魚飛陰火亂虹斷瘴雲通洋貨東西至帆乘萬
里風

止酒

止酒因無酒樽罍久已塵每從皆醉日愧作獨醒
人衰白誰能老清高自得貧舖糟終未敢漁父笑
靈均

止酒慚名飲無人醉阮公沉冥因道喪荒宴爲途
窮雪喜顏猶白花憂淚更紅蜉蝣能幾日一笑死

生同

江間

江間愁積雨水濁少黃魚潮味一春淡海鮮三月
疎白頭甜野筍黃口苦園蔬食力於陵子桔槔閒
有餘

萬里成南瀆西江比北長濁辭交阯國清人祝融
鄉子母禾田沃仙靈藥市香無窮洲島影煙雨共
微茫

不斷離支樹村村黑葉同鳥餐餘火齊人住滿珠
叢北酒南來美春花夏至紅小舟攜鱸具去逐上
魚風

出戶

出戶無行處窮途咫尺迷愁中難一醉夢裏易雙
啼死友都黃土生人總白氏絲來高世士皓首一
蒿藜

戶外行無路茫茫乞食人道高元耿介才老益清
貧口體徒營養芝薇未得仁首陽惟一已容易作
遺民

豫兒

四歲猶為小當予六十時能言須得早識字不妨
遲乾鵲朝多喜涼蟬暮有悲成丁深望汝門戶共
兄持

唐制民始生為黃四歲為小十
六為中二十一為丁六十為老

餅餌貧家少含飴累老親三年懷未免兩乳斷方
新寫解爭斑管眠知讓錦茵字從兄姊問初識是
天人

壽順德二尹

地分南海半城跨北山多縣有神明佐人傳豈弟
歌柳陰含日冷花氣入風和春酒公堂少清如水
雪何

過韓氏宅作

汝愛珍禽甚爲欄畫閣西糞香越王烏餐火外蠻
雞玉髻丁鷓滿珠毛孔雀齊更憐畱客處花隱畫
眉啼

奉答蕭山周子見懷之作

蕭然山下樹多是白楊梅復有紫萼好湘湖葉葉
開水邊玄度宅花外越王臺幾夕錢清月流君秋
思來

蔡子

仲光

平生艸流傳總在君貧餘磨鏡具老有葬

書墳自彼成黃土人誰在白雲殷勤持黍酒養壽

鹿麋羣

庚午仲夏承大司馬吳公招同諸公奉陪京

卿張公讌集城西禪院次張公元韻四首竝

以送行

花宮能避暑卽是習池杯張仲京華上山公燕喜

開地增香浦勝朝待柏梁才早晚袞衣別臺關又

折梅時吳公亦將還朝

一水逐潮迴臨流泛羽杯玉珂花底散銀管柳邊

開六箸仙人戲雙鉤艸聖才荔枝題賦罷更詠酒

楊梅

野飲當鳧藻芙蓉葉作杯天光穿水出人氣逼花

開孝友能為政沈冥亦見才披襟當白雨涼爽未

過梅

定知歸闕下陶侃上螺杯大禹陰能惜長沙業自

開終資高寶力早識太真才軍事仍交廣饒歌奏

落梅陶侃故事侃上武帝螺杯一
枚張公於憲署作惜分堂

為梁疊石學博節母馮太孺人壽

蒼翠女貞枝陶嬰七十時珠毛黃鵠子玉蕊白華

兒掌故多高弟文宣亦老師瓊南諸婦女恨得禮

宗遲晉韋逞母號文宣君
生徒隔紗幔受業

几杖從瓊海歸來白髮長五經崔母子三徙孟家

鄉櫻筍春盤嫩鷄豚夕飭香人師高行早五十一

年霜

題慈雲閣

片片羅浮影穿牕不是雲老人窺咫尺玉女隔氤

氲蒼翠天衣溼蘭蓀梵閣熏丹丘雙白水知向定

中聞老人玉女
皆峯名

覺公善種蘭詩以贈之

最善滋蘭草場師總不如煥寒依月令肥瘠按花
書出葉那能短抽莖更不疎駢枝三五好美種肯
分余

題李子弄瀑采蘭圖

君邊一瀑布噴薄出雲煙若非三疊水定是九屏
泉復有叢蘭好長含清露妍無心似秋色空外莫
能傳

九日送程生

不忍登高去自憐秋思孤菊花陶令有竹葉少陵
無又送將歸客翩翩江與湖心隨鳧雁遠一片在

菰蒲

奉懷湯巖夫王鹿田兩處士

吾友江南在巖夫與鹿田遺民將盡日大老未歸
年葉讓朱顏好花爭素髮妍故人念漁釣終拂富
春煙

二老書多少名山定自畱史應歸草野經只志春
秋白草中華恨黃花一代愁狂奴吾亦爾夢寐每
相求

送李南申英三同李方伯之任湖廣

主人荆岳伯嘉客浙才賢接玉鸞龍步聯珠花萼
篇離心滿香浦別淚注湘川高義能恩我無窮感

激年

掛帆三十里相送白蘋洲
蘭芷無多草瀟湘不忍
秋羅浮憐合體江漢恨
分流越鳥銜珠意長懸黃
鶴樓

菊殘

變紅猶未落心卷只純黃
暖失三秋豔寒爭一日
香酒隨花朵盡愁逐歲
華長豈乏梅新吐終憐
菊有芳
炎方梅易發爭暖不宜寒
獨有黃花晚偏當大雪
殘東籬無此種靖節不
曾看歲暮英方落依依
向藥欄

郎官湖見月之作

郎官湖上月光射漢江
寒太白瑤臺鏡青蓮碧
玉盤自將金椀對誰共
錦袍看捉得蛾眉好纖
纖影畫欄

題姚君廬墓圖

白頭烏似汝啼斷墓田陰
一自悲風木平生廢玉
琴廬依秋竹冷淚滴練
溪深莫更同山鬼離憂
愴至今

黃鼠

榆中黃鼠好肥美薦膏梁
每共山羊飫時分野馬
香地猴銜子出邊女勸人
嘗南客初知味烹調更

有方

地猴形極小人馴養之縱入土穴則仙黃鼠而出邊頭以爲美味

黃鴨

邊頭黃鴨好知是野鴛鴦欲射憐交頸休驚任啜
香浮游無定水沐浴白榆霜候雁紛來去輸他解
向陽

酒娘

酒娘宜好糯甜甚出糟時清濁都難醉壺觴取自
怡蕭騷秋樹葉珍麗節花枝不飲胡爲者吾生已
暮遲

茶子

南油茶子美香晒露花宜絕勝茶靡液當儂膏沐
時雲光生鬢髮月暈上蛾眉寄語燕吳女金錢買
莫遲

落花

落花頻自落不肯爲春畱紅雨成煙去香風逐水
流鶯銜嫌破碎魚食恨沉浮枉使溪翁浣無情向
白頭

東風元不惡花片喜沾泥色謝鮫人染香辭鳳子
棲靡蕪恩易斷芡苡命難齊多負場師意栽培在
玉閨

隨風飄復墮先向宋東家白少同殘雪紅多似亂
霞身輕曾入掌命薄又聽笳馬上誰憐汝黃金贖

琵琶

園菜

丈人筋力少抱甕命兒童石使雲根去泉教井氣
通空心多越薤大葉更胡蔥瓜豆分棚好終年灌
漑功

三花與二蘭朝夕上蔬盤作豉多蠲忿爲齏有合
歡冬憐甜芋煖夏愛苦瓜寒每作伊蒲饌慈姑儘
意餐

肉食吾何忍家人菜色多爲菹鹽苦貴作醬蒟難
和絲落花成豆萍浮葉似荷羹魚蓴更美莖股采
湖波

重陽後一日承見堂枉顧花下分得六魚

坐愛林間石莓苔冷有餘霜甘花易食露濕葉難
書黃菊日以好白衣君莫疎重陽雖已過無酒亦
愁予

辛未元正六日立春值次兒泰十歲生日作
犬子好生辰開年氣色新能先人一日卽得汝三
春外傳殷勤就中經次第親九齡分我百帝與十
回辛

當年占得泰生果值三陽綵合而翁舞甘分祖母
嘗春先人日暖日向立春長示爾辛盤頌應追筆
墨香

人日

年年此人日人恨一人無燭滅迷魂夢香薰暗畫
圖病教明鏡失貧使玉琴孤不盡秦嘉意依依一
繡襦

諸兒

只是縈懷抱賢愚已可知清貧長在外教誨未多
時苦竹纖纖筍寒花嫋嫋枝參差催老大却望長
成遲

失學多因懶非關未得師父勞難責善家做易傷
慈作士無平世爲農及少時帶經鋤自可不日返
東菑

賦得垂柳送客出梅關

垂柳與行人依依爲好春無能繫驅馬只解作花
茵吹笛且容與出關應苦辛枝間烏八九望爾白
頭新

賦得間柳發紅桃

參差水楊柳中有夭桃然綠將紅作裏花與葉爭
妍千千分巧笑一一作春眠相映宜晴雨依依此
海天

不及

不及簷前柳春來卽展眉惹人頻有絮牽客更多
絲雁浦寒煙外鵝城細雨時年年小寒食怕見最

長枝

依依

依依春未去花為美人留况有玉琴好能蠲香浦
愁影憐雙燕過聲愛一鶯流枕簟因君設殷勤向
小樓

送林赤見之懷集授經

吾友有令子五經如井丹少年頻友教長路豈游
盤西水冰初解春帆雨乍寒定知賢令尹雅有得
人歡

幾日辭都講行憂孝養遲豈伊敦子職兼可作人
師雨水收燈候花林罷酒時老成今漸少吾道厚

相期

送汪楷士還歛為其尊人七十壽

春半尚未雨江行苦淺流頻隨歸鴈去不為落花
留子舍依黃嶽親年若楚丘籠葱多玉杖采得自
羅浮

兄弟多才甚君兼作奕秋人無鴻鵠至客有斧柯
愁矯矯來三楚翩翩過五侯還家同老父樂向橘
中求

辛未上巳讌集王蒲衣涑廬分得春字

時會
送李

孝先就婚
於蒲衣

禊飲逢元巳清和鬱水濱桃開千笑日鶯弄數聲

春賦室陪甥館浮觴屬主人青青修竹裏喜見鵲
巢新

清淺同銀漢桃花水正春言乘乘蘭節來送渡河
人烏鵲隨童子鴛鴦作媵臣眾情風舞暢歌入玉
簫新

哭汪右湘

豈意黃山下斯人不可期未過方壯日已是返真
時玉樹埋荒草嘉蓮隕碧池三年招手處望斷阮
溪潛

老友江東盡凋零及少年文章無白首意氣在黃
泉築室當文杏迎予學太玄侯芭今已矣淚濕授

經箋

右湘築文杏山房
擬迎予執經受業

未見而顏色神交日益親才高誰不世道大自無
人槿豔空朝露采寒有古春談林殊寂寂塵尾欲
生塵

過何明府城隅客居賦贈

解組貧逾甚誰憐范使君花從漁父乞穀向丈人
分半畝仙羊宅三春野鹿羣桐鄉尸祝好莫憶舊
燕雲

送陳子楚游

明到嶽山陽題詩楚國香芙蓉春九面蘭芷古三
湘詞賦多先友江湖卽故鄉主人方伯好日夕命

壺觴

奉送吳大司馬還京

東南懸節鉞文武總英高
客宿歸牛女人流愛鳳
毛三吳元治行五嶺益勳勞
一代明珠謗扶風柰
爾曹

鄭重京華入賢聲
答往欽芻求三殿久遺愛
百蠻深太歲仍金馬尚書亦竹林
風流殊不墜晉代至
于今

南塞公來重長城一臂支
馬畱銅柱少人入玉關
遲鼓角難忘戰竿旄易感知
鮫人恩莫報慷慨泣
珠時

畫船珠海動鏡吹滿離聲
百粵壺漿淚三軍乳哺
情武溪思北發灘水怨西征
愴別嶺臺下從今望
玉京

爲連山劉明府壽

山水連陽美樓名畫不如君
爲清惠今日著治安
書上白峯田米純紅峽口魚
諸猺來拜壽花草滿
裙裾連陽有畫不如樓

賦呈韶州陳太守

韶陽賢太守聽政九成臺
帝與薰風曲人隨翥鳳
來花中瑤圃出棗下畫
幡開欲就重華甚陳辭
愧楚才

神君先教化不讓古循良祭酒求荀子箋經問鄭
鄉仁山韶石大智水曲江長風度樓前月遙遙沐
景光

三十簫韶石中開天闕高一從迴玉輦終古想雲
璈政暇舒清嘯官閒枕海濤彼姝無以告未敢辱
干旄

五馬當南塞關門咫尺中梅花秦鎖鑰桂樹越房
櫳六縣師明德三城待聖功相如慙未學亦欲就
文翁

送陶子北征

歲晏愁行役蒼茫萬里鞭白無南雪地陰有朔風
天老馬空知路饑鷹不下田唾壺休擊碎烈士未
衰年

汪扶晨六十有贈

夢魂無處所只是向潛溪白髮有吾友黃山知更
西命將盤石似身已偃采齊六十詩逾好峯峯笑
舊題

老友稀江左年齡盡與君無才真大藥有道總浮
雲得草麈相命逢花鶴不分未知潛口路多少桂
叢薰

殷勤來尺素讀罷置蘭襟雀亦開全尾蕉休捲半
心故人真好我曠世一知音百歲期鍾子洋洋聽

玉琴

孔雀喜則開屏

早年温麗筆衰白益生春玉滿文魚腹珠多老蚌
脣墨分膠漆友茶與水雲人養壽同園綺商顏待
作鄰

贈金磬北

隸書師鄭叟驚絕已知名求寫無縑素飛毫憶老
成一生耽墨妙三體未研精谷口能模楷從君至

舊京

鄭叟名籃字汝器號谷口南京處士磬北師之

白髮湯高逸書家亦一人鳩茲稱二篆蠆尾更三
真以我師心拙多君得法新歸時煩致語名迹寄
來頻

湯蕪湖人名燕生字巖夫雅善篆勢磬北居與之鄰

白首思乘暇臨池學伯英法書研玩少真跡夢魂
傾師有江東友人知漢隸名祕傳須口授湯鄭總
關情

送黃叔威還閩

君歸金太少亦慰旨甘求國老存喬木天年得大
秋三山醇酒設九日菊花浮海氣金銀外仙人在
蜃樓

君有尊人盱眙公

知交閩越少爲我語亡諸有友梅銷在無人大漢
餘侯官數災異高叟斷音書晚景憂孫子題詩恐

太疎

高叟謂雲客

君來慙地主值我最貧時一日房櫳語三年夢寐

思仙畱鈐記在老作舉嵩期英霸吾非噐龍光騁
已遲

水菽艱難甚關山跋涉中能勤雙白髮又是一黃
童別處愁殘日歸時苦颺風福興諸好友心事爲
相通

林子餉梨有作

多君大谷梨紫實壓霜枝亦未含消似偏令津潤
滋冷愁尊老嗜香恐小男知稍待微酣後甜冰食
不遲

郭君酌我延壽佳酒賦以答之

多君仙醞好不惜甕頭開爲我斟元氣畱春在玉
杯長年憑美祿名飲見狂才自此乘佳日頻過踏
紫苔

林芥

林確齋先生始製此茶名曰
林芥先生故周府宗侯也

峒山真芥好學製有遺人庶子今林姓周家舊懿
親金精栽絕巘紫芽摘先春廟後香全似泉兼蟹

眼新

金精
山名

扶晨屢以紫霞茶見寄賦以答之

紫霞頻見寄香白露芽鮮摘定先寒食烹須就乳
泉摩娑雙白甄斟酌一青娟歲歲封題意殷勤感
汝賢

壽光軒作

白髮猶良食婆娑花樹陰弄雛過白日飲乳向青
琴函首無雙意鳴鳩只一心膝前孩笑好兩兩助
清吟

題呂紀梅雀圖

絕似邊鸞好枝枝雪可攀粉微沾翠羽香欲出寒
山啄藥當明月驚花墜玉顏畫時圖辟暑宜爾素
屏間

喜侃士病愈贈之

炎方人易病勿藥汝遲遲難老無如學多才自有
時暖風薺麥秀涼露薜華滋不及黃黃菊神仙食
更宜

蒞雞初在野最早得秋寒亦未傷遲暮其如行路
難忘言但吟嘯與道日游盤青歲還經學紛綸一
井丹

坐隱須棋局從君奕旨求馬融思作賦祖訥待忘
憂黑子饒難少香囊賭尚畱蕭齋楓葉下相對一
高秋

君家富山水復有父兄賢孝友光閭井壺觴媚老
年白華無大小朱萼總芳妍汝也吹篴好聲高五
子前

石筍森如束枝枝上有采有時仙掌出鎮日谷煙
封羽化三天子髯畱一老龍容成應可接歸向玉

芙蓉

新安多好
友招手十年間
以我浮丘客
應居黃帝山
明春單舸往
及爾故園還
一浴硃砂水
乘秋返

庾關

廣州城西
有浮丘山

喜羅君又持扶晨書至

新安江好水生得有情魚
歲歲銜芳信年年到做
廬夢魂因爾少音問更誰疎
自古瀟湘客鱗鱗愛
勝子

白雲泉

白雲山上水幾處作名泉
今夕龍團味全勝蟹眼
鮮湍流非瀑布仄出向巖烟
酒渴真宜汝壺觴玉

井邊

元孝六十又一日賦以為壽

長兄叨一歲十六結交知
以爾真賢友而翁更哲
師忠貞三世早事業兩家遲
此日難為壽慙過耳
順時

同生霜降月搖落每相憐
喬木先朝古黃花故國
妍琴惟天馬引歌是楚漁
篇未可傷衰暮殊多獨
漉年

漢代羽林子孤兒今幾何
餅侯孫氏少劍客李家
多寇雉銜霜去邊鵬蔽日
過文淵雄顧盼明歲未
蹉跎

臣妾誰鳧藻迷途一布衣又嗟寒露濕未見太陽
晞壯髮霜雖短初心日未非杖鄉多一歲好待據
鞍飛

却老文章在無歡亦寫心壽光還導引方朔只浮
沉味愛篋管苦香憐橘柚深齊名從少小千載一
雕琴

出處一浮雲窮通祗共君無憂惟作述有道卽功
勳竹影龍公合采陰鶴子分纏綿敦世好彼此挹
靈芬

奉題惠陽王郡侯署中憶雪樓

嶺海行春罷樓開盡物華欲將天北雪來潤日南

花二嶽窓間直雙江檻外斜自來仙太守山水滿

官衙

公寶
坻人

豈無南雪好朔雪易成花幸有羅浮樹光含漲海
霞使君移綠萼么鳳自金沙手澤樓前滿甘棠卽

白華

羅浮有
金沙洞

姑射元冰雪炎方亦覺寒神凝在浮嶠夢去只中
盤瀑布爲膏澤芙蓉卽大丹更令樓外水清作使

君灘

公家近
盤山

峯愛穿簾小來從雙玉盤莫將湖內外都作月明
看政事惟高臥顏容更渥丹謝公鳩鵲句書徧碧

瑯玕

雙玉盤謂內
外豐湖也

爲順德徐明府壽

未知碧鑑水清似使君不莫擲沉香去將成芳艸

洲政成高臥裏年與大春畱難老無煩祝徐陵正

黑頭

碧鑑水名

大寒

大寒偏易暖寒向小寒時亦有空林雪梅花似不知病須春色早貧恐水仙遲多謝萋萋艸穿冰已作絲

窮陰天外積寒絕逼春來尚苦連朝霧南風濕不開已新長至柳重吐小年梅臘酒誰家早鶯知爲我催

舟次小塘

北風向暮起心折峭帆斜兩岸卷黃葉一江吹白沙那堪與鴻雁自此長蒹葭舟發才三夕蒼茫已憶家

北風吹水淺勢使沓潮迴凍苦江沙合陰愁雪色來消寒餘酒滓擁暖只爐灰且喜河邊柳年光已暗催

舟入橫槎水作

漁舟不覺遠深入一溪霞煙火燒紅雨牛羊飯落花水聲分亂石山影散晴沙鶯喚人酤酒垂楊第幾家

爛柯山作

陰森十餘里榕間木棉多啼鳥不知處嚶嚶連伐
柯斜峯飛欲墮亂水響難和猿狖時窺客相將下
女蘿

送李君還秦兼寄懷其舅孔德太史

白頭知己盡而舅最相思萬里空魂夢平生此別
離自矜辭爵早人恨著書遲鍼藥憑誰進蕭條臥
疾時

越有南枝鳥秦餘北地人文章高並起羽翼夙相
親汝病躬方有吾衰性未馴參商應有日再見渭
川濱

尚得存尊足奚勞患有身孤桐雖半槁碩果定重

新高臥復何事蘧廬餘一人平生知作達佚我豈

雷巾

君得癱
疾之疾

爲予催李漢文錄早成之往日昌黎壻而今伯道
兒全書畱太舉副本在京師作序題前後蕪言不
敢辭

李漢君
之嗣子

林叔吾六十生日賦以贈之

少予猶二歲髯白已三年未是桑榆日方開艸昧
天加餐休服食好學卽神仙六十多吾友參差杖
國前

六十蘧公化前賢似者希未能惟寡過不盡是知

非道與浮雲卷情終故國歸有君同此意衰白益
光輝

白首如新識情因患難長白公磨劔利黃叟採芝
香慷慨歌同病艱難笑備嘗未應春色裏送老是
壺觴

更使詩歌好風華要絕倫鶯花爭一日筆墨鬪三
春世棄沈冥客天迷故舊人阿兄應待汝開目似

馮信

令三兄近得
青盲之疾

令子知名早雍容友教時一家能有學二祖更無
師理窟禺山下談林莞水湄趨庭說風雅先解阿

翁願

二祖謂君之高曾
光祿公御史公也

石上圍棋罷乘涼坐到明燭殘須日出膠盡自河
清寂寂生前事茫茫身後名一杯空所有何物是
殤彭

寄贈歙人汪伯子四十

不因仲弟好安識伯兄賢孝友尋常事如君自可
傳飛騰才四十文藻且連翩黃白雙名嶽相期躡

紫煙

杜詩四十明朝
是飛騰暮景斜

子舍多山水娛親煙翠重乞將三十六都作老人
峯爲長已強仕棲閒多好容三珠三弟在花萼有
餘恭

黃山有三
十六峯

汪仲子持令兄栗亭及諸君書自歙至廣州

相問於其歸也為詩二章送之兼寄諸君

玉琴久不撫蕭瑟向烟汀豈不志山水知音非栗
亭一人持尺素諸子在雲屏相望亦云久君歸慰

杳冥

相思黃嶽甚况復故人多汝向豐溪曲為予傳嘯
歌白雲無事否春色柰愁何心似諸峰月依在
女蘿

夕向訶林承二三禪人畱宿風幡堂即事賦

贈得風字

解與陶潛飲清狂即遠公好將虎溪水移入酒泉
中燭秉何須月幡吹只是風欲眠無醉石為拂半

牀空

自胥江上峽至韶陽作

送至禺陽返含情是海潮峽猶雲母隔峯已石人
招古寺愁飛去無人問沈寥菩提兵火後一樹白

南朝

石人謂望夫石古寺謂飛來寺

胥江沙水淺取蜺蛋船多男女無餘粟生涯是扁
螺吞腥安水土足跣弄煙波苦竹春叢外時時聞

鬪歌

蜺一名扁螺

潮鷄鳴未已微月逐潮生水宿難為夜舟開不待
明半帆煙樹影一枕草蟲聲不寐懷衰白勞勞水
菽情

夜久息羣動寒螿聽漸微那知零白露但覺濕羅衣
魚食星河影鳧眠水石磯坐來斜月上吟嘯發清機

江中蕉葉似小艇賣魚家蠓蛋雖無女釵髮亦有花
蕩槁楊柳浦曬網鷺鷥沙白髮多公姥蕭蕭水

一涯

蛋人有三種一曰蠓蛋

不覺舟行遠仙源信幾重二禺兄弟峽一石婦人

峯澗斷知無棧林空似有鐘春來霑雨少瀑勢太

從容

黃帝二庶子禺陽禺號居中宿峽故峽一名禺峽婦人峯亦謂望夫石

一日始一峽舟行苦逆風暮春猶苦凍長路正愁

窮棧閣飛巖外檜巢古木中繡夫歌有哭聲與斷

猿同

艸映一川綠萋萋含夕曛有無樵子路三兩鹿麕

羣峯束易成峽巖空多出雲削成無數壁奇自峯

山分

屏風知幾疊雲錦夾天開樹樹倒垂壁峯峯陰積

苔野花多有子山雉絕無媒繫牒幽潭口言探石

髓回

篙篙答幽響霞壁盡中空自發多鐘磬相吞是水

風石泉如乳白雲葉比花紅處處層城似丹樓望

不窮

灩澦堆無數春行值水深帆驚飛石過牕苦濕雲

侵螢外依漁火鴛邊夢錦衾戍夫催泊早烏鵲未歸林

石角篙無力灣環似二禺劃天多鐵壁拔地卽香鑪花墮千尋藥藤交百道鬚時時巖洞裏飛出片帆孤

仙靈多事甚古寺使飛來艸沒蕭梁碣花迷庶子臺峽長峯易合嵐重日難開阮險吹頻裂聲含秋雨哀

軒轅上天日帝子亦成仙吹笛知何去遺音空暮煙君臣雙絕峽兄弟兩飛泉終古餘湯沐禹陽蒼

翠邊

黃帝二庶子與其臣初武來開禺峽采阮險之竹吹之

峯晴多變態一半作空青何處朝雲影而非神女靈髻和煙霧墮衣雜蕙蘭馨一路疑行雨泉飛徧杳冥

野花名漸識春摘未曾遲日夕但盈手芬馨能幾時芝薇秦有客橘柚楚多師豈以篋管好青青帝子枝

女蘿纏玉手攀磴與雲平拾果知猿戲穿枯恐鶴驚水分雙練下風作一琴鳴坐久忘舟楫依依到月明

亦知行路苦爭柰水雲心白鵲未三里寒猿已一吟江南楓樹滿峽北荻花深青草無窮瘴王孫何

處尋

山花名獨舞山鳥號相思更有香含笑兼之綠畫

看邊鸞殊未見嵇氏詎曾知好把圖經補丹青寫

莫遲

南天已初夏水宿易生寒夜夜雲三峽朝朝雪一

灘羊皮漁父服蝶翅羽流冠莫向桃枝笑今非釣

國竿

惠妃能苦戰巾幗有功勳廟貌香爐峽風流錦繡

軍神鴉喧飲食仙蝶亂衣帟籤語期相助揚靈向

陣雲

壁壘餘麻寨浚洸戰跡多靈旗長肅肅古廟每峨

峨破賊當高峽追讎到濁河豐碑從宋代終古鎮

風波

麻寨在英德城北與浚洸鎮皆有夫人祠夫
人俗稱曹主娘娘宋嘉定間謚曰惠妃以其
生能破黃巢沒能滅尚寇云

碧落英州洞莖通直到天御牀南漢在丹竈羽人

傳水滴成鍾乳霞疑作寶蓮玲瓏巨靈手斧鑿出

天然

碧落洞南漢號
為雲巖御室

嶺表全韶地天南古帝家文明開百越濬哲自重

含葩

帝城雲裏出天闕石邊開已就重華得如遊瑤圃

來聯綿九疑接想像六飛迴一片蒼梧恨長含武

水臺

六六玉芙蓉鳴琴知幾峯如何百蠻狩不遣二妃
從絕徼餘城闕荒祠尚鼓鐘月明瑤瑟至應渡水
雲重

九成臺縹緲知是有虞宮二女明霞外重瞳麗日
中珠丘梧野北玉輦曲紅東髣髴簫韶在音含閭
闔風

野艇魚秧至人家蠟樹來郡當三峽盡城夾二江
開柱蠹天多石衣垂帝有臺陳辭無不可咫尺卽
蓬萊

嶠外元仙窟瀧東卽帝鄉爲憐韶石好不覺武溪
長就日懷龍馭歌風想鳳蹠如何騷些客悵望秣
瀟湘

繞城三面水滇武合南流虎戰空多壘狐鳴總一
丘攻堅元下策間道本陰謀多謝青燐影長含漢
月秋

開元高相業崛起曲江間報國多金鑑傾城一玉
環文章元帥在風度盛唐閒正始音誰繼書臺灑
掃還

唐玄宗嘗稱曲江公爲文壇元帥公有書堂巖在始興

心逐流泉去潺湲一夜無不因寒月好爭覺玉琴
孤稍起沙邊雁時驚枝上烏故林相憶否人在一
菰蘆

鄭方二君以生鷓鴣數雙見貽賦詩答之

梅關殊未度柰爾喚歸何錦翼因媒得雌雄占嶺

多故人勞見贈南客辱相過未肯開籠放鈎輶要

聽歌鷓鴣一名南客各占一嶺相喚

豈不畏霜露箴中且勿驚向南徒有意畱客枉多

情買恨金錢少餐愁七箸輕不教憐復損為盡對

啼聲

夜飛將木葉相蔽露華間格磔知何處卑棲各一

山性真同我野聲苦學人蠻歸笑小兒女衣裳似

爾斑

不少黃茆嶺爭山鬪一春為憐苦行路終日喚征

人挈汝閨幃返應知飲啄馴白鷓相伴處林岫在

城闥

南枝稀越鳥餘爾鷓鴣羣煖就羅浮日陽隨漲海

雲影從荒艸合聲向亂峰分珍重雕籠裏山鷄却

羨君

歸為堂上饌未忍佐膏薌有幸烹雌婦無憂啄粟

場華軒供愛玩故嶺絕迴翔翅戒兒童剪從他錦

繡張

鷓鴣亦有草蝴蝶詎無花羽翼持相比芬芳總一

家絕憐南翥好差勝北枝斜為爾將歸早飄零免

塞沙

歸使青娥見知頻唱鷓鴣斑衣
猺女似香瘴越臺
無食豈爭鷄口棲寧嫁雁夫
北禽欺汝者逐我莫

愁孤

太白山鷓鴣辭
得燕山胡雁塔

贈某駕部生日

端午前二日

星使來揚越翩翩漢節旄壽樽蒲屑細詞筆藕花
高粟有東方朔金無北郭騷氤氳香荔子持慰大
夫勞

過尹爾復園亭贈之

古木高曾樹陰涼滿一園鶴巢多白鷺蟬咽似清
猿好學人難老棲閒道易尊芬馨春氣內細艸亦
蘭蓀

復上韶陽述懷呈使君

無端又千里秋更上韶陽爲有丹霞好那知白露
涼使君惟孝友孺子豈文章分得萊蕪釜微塵已

絕香

丹霞山名

尚平遊未得兒女事茫茫白首勞婚嫁丹丘闕稻
梁殷勤干太守不敢臥羲皇好是言辭拙相知迹
久忘

一路迎鴻雁行將及庾關那能似潮汐祇到二禺
間母待韓康出兒催孺仲還艱難因水菽未忍老

棲閒

南海之潮至中宿而還中宿者二禺峽也

不出非慈孝晨昏且暫違負多千里米餐少一人

薇知已惟廉吏無顏是褐衣晏嬰鞭可執忻慕似君稀

樓中容易捉不是酒仙人跡向臺門託情將露冕親能令高士賤祇爲使君貧一勺滇江水魚枯未

濕鱗

唐人詩天外常求太白老樓中捉得酒仙人

海內無長句山東有謫仙吾師惟樂府汝愛似青蓮狂客四明在神君一代賢金龜重使醉水底酒

星眠

少陵詩近來海內爲長句汝與山東李白好

惠陽娛江亭作

惠陽爲客久酒盡最愁時已有涼蟬咽還餘落葉悲江吞湖水淺舟出浦沙遲風好無帆席飛飛羨

鷺鷥

贈羅顥甫五十又一生日

我友交相敬殷勤五十前方過知命日未盡慕親年大小經都授春秋義更箋石渠諸博士家學首韋賢

五十初遊學荀卿汝勿憂老師三祭酒弟子一浮丘小序持風雅微言接倡訓漢儒師友好將子湖源流

寡過慙蘧瑗行年五十餘精微惟學易老大欲拋書健未家庭杖貧應市井居無成吾著述祇恨費居諸

白頭同有母奉養愧羅威謀食身難隱居貧志易
違和柔春草似皎潔白華非愛日心無極朝陽露
莫晞

慰蒲衣

德耀先朝露深君悼儷情雖無裘褐在詎忍水雲
輕老病因兒女艱難託舅甥不須悲物化曾共學
無生

子荆頭易白况值悼亾時早已傷哀樂那堪更別
離月沉飛鵲鏡花落合歡枝已矣誰偕隱茫茫負
戴期

幸當婚嫁畢陶寫好忘情絲竹須安石雲山且向
平孟光多逸事徐淑更才名彤管人皆豔芬芳似
女貞

落葉夫人淚哀蟬武帝悲仙靈遺蛻早騷些放招
遲昔我離鸞恨殊多別鵠辭君今傷燕婉何以慰
哀思

送王生還紹興

蒼蒼天上月化作鏡湖來一片紅蕖水平生碧玉
杯昔移蘭棹去每拂若溪迴梅市幽棲處憑君掃
紫苔

勾越多知己風流屬寓山黃泉都飲恨白髮幾棲
閒有節無終乳無家鶴不還爲將存歿意傳與淚

潺湲

爲翁君壽母夫人

共有百齡母孫嵩世所稀今朝看壽酒先獻汝慈
幃戴勝西王喜餐花方朔肥堂前迴舞袖兩處媚
春暉

自公房作

玉屏峯未還花下一局關卽此已空寂無人知是
山磬流松戶外碁落石牀間却厭涓涓水無生說
未閒

贈劉顯之生日

同庚俱白首文學汝翩翩師是蘭陵老人惟祭酒
賢菊含長至豔梅吐小春妍共是歲寒物冰霜得
大年

慰林仲子喪明

明在何曾喪行教日再中復唐須獨眼興楚豈重
瞳甘菊曾延壽黃精且養蒙閒來成國語暫與左
丘同

不覺成衰謝蹉跎變亂時先臣懸日早國士漆身
遲竹少孤生節桐多半死枝易中高用晦爲子說
明夷

慰獻孟

四十已敦杖未應衰謝時病因枚叟却憂爲步兵

持薏苡餐須早，菴飲莫遲先。公廉潔甚貧，與負薪期。

雞骨朝來健，王戎免在牀。顛雖長孺禿，足未子春傷。漢臘難忘舊，韓仇欲報長。參苓加減好，咫尺有

韓康

鄰有鄭君善醫

懷吳客

勇絕吳閭客，縱橫擊劍時。多仇惟伍子，無力是要離。患難終能免，飄零更不辭。從誰乞漿飲，漁父莫令知。

朱太史竹垞至五羊，苦不得見，詩以寄之。

輦轂分襟後，相思廿四霜。如何來咫尺，亦復作參商。著作知無數，聲華總未央。可能從幕府，暫到海珠旁。

贈從化郭邑侯

新鄉人

圭璧鄙君子，干旄衛大夫。武公知汝是，姝子得人無。邑枕花溪上，城開石鼓隅。箋經爲政暇，鎮日對雙梧。

魯史君家學，孳孳筆削心。專門三傳早，吏治一經深。政簡宜山縣，書成亦竹林。漢儒推董氏，黽勉嗣高音。

癸酉人日作

無心作人日，祇爲箇人無。光采存魂夢，丹青失畫

圖酒沾黃土盡花供素瓶孤廿四年來恨空悲子
母烏

贈蔬隱丈兼為其七十又一壽

桔槔無不可久息丈人機窺菜應多暇持蔬亦自
肥酒香難白髮花老尚紅衣百歲尋常事看君兩
古稀

除夕詠感擘和王使君

八首

苞品諸珍淑南威未易求紅鹽驚一夕青子落三
秋臭味蘭心合芬馨玉齒流使君蘋果好共遣歲
華愁感擘即橄欖一名南威子瞻詩紛紛青子落
紅鹽時歲除使君兼以寶坻蘋果見餉
青果回甘物分來守歲盤味同良友諫香得美人

歡落愛南枝晚餐宜白露寒雌雄人未識都作木

威看橄欖一名青果亦曰味諫以白露後摘食不
病瘡其枝南向曰橄欖東向日木威高雷人

以為者為木威
為雌青者為雄

細切辛盤裏頻添素手香青黃生半摘甘苦老全
嘗越俗多為鼓吳風更作湯見珍因踰嶺爭取不
盈筐

咀嚼能終日含滋恨不畱森嚴多正味芳潤少煩
憂仁小休懷核頭纖可作鉤分曹爭射取衣袖暗
相投子瞻詩正味
森森苦且嚴

口實檳門似舍辭總若蘭逢君陳臘果喜得上春
盤小辣能忠告微甘亦合歡雕花多女贊珍惜掌

中看

粵俗以糖梅糖欖雕鏤人物花卉以為婦贄櫛門即檳榔

瓠犀初苦澁不食未曾忘訶子難回味油甘亦少

香乾愁青玉皺濕恨白絲長餞歲多秋實如君最

耐霜

訶子油柑子皆與橄欖相似謂油柑即餘柑子非欖中有絲欖有丁香欖

本艸那知汝芬芳更有情既多賢友義復得美人

名大小丁香似艱難碩果成歲除方見取嗟爾後

時榮

有日新婦欖

煎取餘甘味泉花泡更開清香因火發苦澹得鹽

回未試調梅用先揮頌橘才嵇含箋艸木博物復

公來

餘柑子即橄欖升菴言有餘甘子煎朱氏言橄欖得鹽不苦澹

題從化郭明府冊子

城邊百丈帶曲折下流溪山縣白雲滿訟堂春草

齊書成玉杯外政報金門西又拜春秋疏人人一

卷携

江臯作

春聲一兩轉水木已清華嬌鳥不知處時時驚落

花折梅無浣女吹笛有漁家曲曲幽尋去沿溪一

小槎

衍聖公壽詞

上公王者後宗子聖人孫世接神明盛身持德教

尊尼山培道脉洙水浚文源君子多仁壽絃歌不

可諉

爲順德明府壽

地分南海大城接北山長令尹來何暮謳歌正未央
依然古遺愛不數漢循良父老稱眉壽梅花佐
舉觴

詠竹

慈孝枝枝翠籠葱第一竿霜乾春粉煖露濕膩香
寒嫋嫋堪垂釣猗猗亦合歡琢磨同衛武辛苦爲
琅玕

石上檀欒滿霜根結幾深芳辛嘉桂德空洞老松
心未忍多爲杖時因罷鼓琴含風娛暮節一一籜
龍吟

哀述

昨日猶孩笑諶堂七筋邊免懷頭白日傷性血衰
年苦請終無帝窮呼豈有天代身如可得爭赴是
黃泉

白頭初失乳依怙更無時已恨全歸晚還傷反哺
遲鹿猶銜美艸鵲欲化空枝淚逐霜華落沾濡不
自知

新爲無母子六十始嬰啼哭向天邊斷魂隨地下
迷林鳥飛引鷲野鹿食鳴麀我獨傷何恃徬徨日
影西

欲愛終無日匆匆大耋年猶驚惟喜懼最憶是餐

眠月上杯圈設花開几杖遷那能相哺食更樂乳
鳩天

早寡陶嬰似艱貞五十春未亾黃鵠苦垂老白華
貧養志惟高尚忘憂是隱淪期頤曾未得有憾昊
天仁

手澤芳菲盡啼痕作露華薤非長命艸萱是斷腸
花風樹無多地泉臺自一家雙鸞生死孝總欲殉
黃沙

無以爲忠養清貧似素秋雙鬢陶母盡一縷敬姜
畱雀舌餘茶盃蛛絲滿藥箒茹齋過九十馨潔愧
蘭羞

自今憎佛日悔乞白毫光大忌逢佳節終身恨法

王音容歸寂滅體魄合鴻荒咫尺慈威失庭闈在

北邙

母以四月
八日終

匍匐開泉路墳成馬鬣時烏銜凝血土猿掛斷腸
枝合骨先公速迎魂故宅遲弟兄交手哭中路作
孤兒

祔葬從先子高曾接墓田淚枯松柏日哀斷蓼莪
天同穴重封樹如堂一几筵羅威吾欲作沒齒白
楊邊

柬詹丈

炎方秋未涼蕭爽喜禪房僧作棊高弟花爲客故

鄉無生非老病有道在清狂為作臯魚操淒然風

木傷

文善琴

颶風大作墓上亭幸免毀傷有賦

鐵颶今年甚偏完墓上亭未曾驚體魄信自有神
靈筋力重封樹文章早勒銘松間巢一一無恙鶴
梳翎

艱難三月葬餘力一亭成風雨勞相保茆茨幸未
傾似憐廬墓處欲慰子春情掃地殷勤祭寧親向
九京

癸酉秋懷

欲作瀟瀟雨先之落葉聲似聞天上鴈嘹唳滿江

城遲暮人何在悲涼事不成匆匆憂用老有負是
生平

今年搖落早風木助予悲歲又將寒候天無復曙
時病難依墓久貧易出門遲明發何曾寐幽幽燈
火知

老來難學問况在極貧時往日真堪惜窮秋未足
悲白頭思殉母黃口忍捐兒已矣王孫裸重泉速
朽期

霜降從零落蒿非美菜莪所生今已矣無忝更如
何喪禮貧難盡哀吟老易多無心還養壽采藥向
巖阿

鷺風秋大作無恙墓堂新孝感非孤子神靈是二
人竹多留鳳尾枯未破龍鱗一一棲烏在飄零祗
洽旬

夜夜精魂接音容在夢中照愁無白日吹老有悲
風地下身應佚人間路已窮霜華滿青草肯放白

頭翁

草中有曰
白頭翁

慘怛真無告天民此益窮水漿情未盡霜露愴難
終涕淚全枯柏形骸半歿桐痛深悲創巨斬刻勢
相同

搖落又如此吾今亦變衰蕭蕭餘兩鬢白白但雙
垂清露惟須濯涼風不用吹羸軀休更病已有老
相隨

白冠依太古衰絰忍離身苦憶惟慈愛勞心是棘
人時時聞歎息點點濕衣巾顧望無瞻見蒼茫泣
上旻

血隨清淚盡號泣但餘聲心弱思難盡神衰夢易
成雁邊霜亂下螢外月微明不寐時吟歎棲禽亦
未驚

零落高堂菊秋霜凜冽中花隨人事盡葉共歲華
空歌斷哀誰告魂招賦未工淚沾衰艸裏都作雁
來紅

葉葉啼痕濕非關清露滋栽培垂老日黃落未寒

時蟲食何曾苦蟬嘶不自知蠨蛸絲已斷喜母更無期

幽居已蕭瑟秋氣益生悲落木一相感哀猿無盡時心隨萱艸歿淚向竹枝垂往日多行役空傷孝養遲

老始爲人子身歸父母遲誰令英霸器自失亂離時日苦揮無力天憎問有辭秋霜肯相念且莫鬢如絲

淚多雙鏡濁欲待菊花明九日無佳色三冬始落英沈冥非此日哀痛是平生銜恤知何向茫茫永慕情

苦雨作

一夕幾風雨幽林寒不眠夢惟啼老母魂祇向重泉有道貧須絕無身患未捐茫茫兒女事五嶽去何年

雨聲無斷續一一入愁心寒絕因長夜春多是積陰白頭偏累重黃口更情深乞食終何補言辭拙至今

無人招越散魂爽有無中老爲多哀痛愁因久困窮柝衣悲賤妾瓶粟苦衰翁雨阻東門出舖糜過屢空

欲去知何所途窮已一生蒼茫惟有慟嗚咽每無

聲心易雲山遠身難杖屨輕連朝春雨苦喜鵲未
催晴

苦是三冬煖畱寒到好春白猶梅蕊舊青未柳條
新魚炙傷寒食鵲啼似棘人旨甘慈地下有婦定
酸辛

修墓

先公埋玉樹中踞寶珠峰列嶂參差對旁林紫翠
重未歸華表鶴空老戢山裕祔葬傷吾母淒涼馬
鬣封

墓崩修已屢剪伐恐松楸多謝樵蘇客能舍躑躅
愁何當化猿鶴長此禦羊牛麥飯陳翁仲殷勤一

古丘

莪蔚哀長在鴟鳩養已無孫悲黃口小子痛白頭
孤羨道青松夾祠壇紫石鋪弟兄爭一簣積土向
平蕪

修墓乘春薦兼旬艸土間經營多壞樹筋力盡溪
山體魄知安否神靈儼未還與兒共匍匐手足蘇
痕斑

瀑泉千百道添作淚泉來已罷奔飛雨猶含噴薄
雷杜鵑啼未死蝴蝶落還開幾日墳門築頻悲宿
艸催

淚共春溪水爭流無盡時血枯松柏早魂作子鵲

遲嗚咽終天恨蒼茫罔極悲年年長負土一半委
棠梨

白雲開丙舍丹荔種丁香松引層城遠溪環九曲
長更須蒼樹補添作翠屏張鬱鬱佳城好魂應戀
故鄉

奉柩歸同穴先人宅兆安髮膚悲尚煖霜露愴非
寒但抱終身慕能承幾日歡雞豚長已矣始恨逮
親難

雨滑溪山路衝泥到墓林姊歸吾與汝哀怨一何
深地飲無窮恨天銜罔極心野棠春不發應苦淚
痕侵

松風發衣響蕭颯有餘悲豈似素冠者猿啼無盡
時已教如失乳更使葉辭枝子母瓜今苦真無鉤
帶期

松爲先公買蒼蒼已作林誰非仁孝者忍有斧柯
心培覆憂難久攀號直至今巢中多鶴子累爾和
哀音

芟艸憂荆棘蒙龍墓道侵雨多崩馬鬣雲重失牛
心谷自作碑辭拙誰題筆勢深先人潛德在光曜
滿空林

於兩大人冢旁作予生壙書示兒輩

吾生猶有事且莫作蜉蝣骨肉未歸土衣冠先首

丘招魂新些只裸葬古風流三尺依親墓應寬千
歲憂

天墜玉棺遲斑斑沐榔宜千年疑虎魄四面瀝
脂速葬傷貧窶長號失聖慈爲親薦螻蟻吾穴莫

教移

先慈棺槨以
松脂周之

未能卽蟬蛻風露且勝秋速化復何恨長生安所
求九原依父母千載作松楸他日薪多衣吾歸此

一杯

生前違孝養死去報劬勞杖几空山冷庭闈宿草
高從旁作玄冢向下卽蘭臯壤樹先兒輩毋煩畚
鍤操

無山堪筮宅耐葬未違親幸有全歸日嗟非不朽
人雲開千嶂暖水漾一溪春築室先居此三年待
返真

子綦雖喪我桑戶尚爲人處順從吾適安時任此
真漆園自知化姑射且凝神生壙經營早依依爲
二親

未喪孤生質猶存半死身桐焦空有尾松老欲無
鱗溝壑難忘日淵冰易墜人先坐欣得耐免作道
旁塵

暮春村行

水漲平橋斷微茫春渚西不知一片雨添得幾長

溪漁艇渡頭冷白鷗人外低因看木棉樹村路未
曾迷

蒼蒼二三里烟火雨中村雞犬不知處桑麻無與
言翻嫌山氣濕未厭水聲喧花向牛羊落泥香接

一園

一春愁雨濕寒欲到清和鶯語幾時好花開何處
多魚飛驚白鷺馬牧失烟莎漁父非知己休聽鼓

柘歌

漸近清明候寒深積雨中已遲芳草綠更滯木棉
紅水潦農人苦豚蹄野廟同紛紛啼布穀尚覺稻
田空

病起作

丙子初春時
年六十有七

康熙三十五年

愁因春色豁病逐歲華除豈欲長居世惟思更著
書身慚枯木在心恨死灰餘那得長爲蝶翩翩向
太虛

物化何妨速蜉蝣卽是仙如能生羽翼便作一高
蟬抱影歸明月遺音在碧泉泠泠風與露吸飲病
長捐

處順吾何事餘生且復留藥勞賢太守方得古丹
丘未死終無用非仁豈有求自今除痛苦更得幾

春秋

惠州王使君韶州陳使
君爲治方藥病得以瘳

伏枕已多時春光總未知兒歡梅結子女喜柳垂

絲杖好扶須力冠輕戴莫移郊行殊未可兩失野
人期

人日榆林王夫人生辰追悼之

因卿廢人日已歷廿餘春盡恐容顏改香教夢寐
真毛姜應是汝玉女本非人舉下歡如昨迴思淚
滿巾

昔時人日好有美一人存此日陳花勝丹青慘不
言烟消埋玉地月冷浣香村試拂生時鏡依稀見
淚痕

秭歸

秭歸文藻地佳麗復娥眉終古香溪月光含神女
姿江山空翠外雲雨沈寥時蘭芷香無極行人不
自持

弱年

弱年已好道垂老未丹成悔別青山早徒令華髮
生窮猿吟嘯苦饑鶴羽毛輕幾度思長往飄然向
玉京

蟬

不食蟬無力聲如易斷何露華涓滴少秋氣沈寥
多高潔雖天性悲涼豈太和蕭蕭玄鬢影一葉亦
婆娑

病中奉柬王南區使君兼送之任川南

一臥百餘日相關惟使君藥錢能苦致餐物每甘
分羽恐蟬將蛻聲愁鶴不聞明朝掛帆去誰復念
孤雲

日來思復食杯箸久生塵感爾金無橐遺予味有
珍輦田香秣美浙海鯨魚真稍損甌中物肝腸卽

古人

賈浪仙有臥疾酬昌黎詩
身上衣頻寄甌中物亦分

裕老思爲石桐焦待作琴但存辭世念竝絕學仙
心暖喜茶烟入香嫌藥氣侵君來憂絕粒又與白
山篔

一室沈冥日全家慘淡秋無生曾亦學不死欲何
求香燼烟猶裊燈殘焰未收念君行有日相訣且

淹留

此別最凄然當予衰疾年淚同春雨水流滿大江
烟賦望將歸日魂招未死前休令巴峽裏添得一
啼鵲

流淚到瀟湘君看必斷腸時無騷子姓定少楚辭
章哀怨一家善風流終古長投詩贈先子招我共
瓊漿

病中柬元孝

病已知難愈踟躕欲委形黔婁誰作誄貞懼汝題
銘咫尺將魂爽羅浮入杳冥兒曹營髮豕教近錦
雲屏

